

列
朝
詩
集

列朝詩集

閩集卷第

高僧一十一人

道士六人

西齋和尚琦公五十二首

愚菴及公八首

全室勛公一百八首

蒲菴復公九十四首

覺幻菴住公三首

少師獨菴衍公五十五首

南洲法師洽公二十首

蘭江楚公二十首

懶菴禪師俊公五首

清遠禪師渭公五首

雪廬新公五首

張真人字初六十二首

子陽子席應珍四首

余善六首

盧大雅四首

周思得三首

鄧青陽羽二首

西齋和尚琦公

楚琦字楚石小字墨曜象山人族姓朱氏母夢日躋懷中而生襁褓中有神僧見之曰此兒佛日也他日當振揚佛法照曜濁世因以墨曜字之九

歲趙文敏公見而異之爲鬻僧牒得度得法於徑山元叟端和尚帝師錫
號曰佛日普照慧辯禪師洪武初詔徵江南戒德高僧建法會于蔣山師
居第一再召說法親承顧問賜伊蒲供于文樓三年秋召問鬼神之理館於
天界寺示微疾索浴更衣跣趺書偈曰真性圓明本無生滅木馬夜鳴西
方日出夢室噩公問曰何處去師曰西方去堂曰西方有佛東方無佛耶
乃震威一喝而逝茶毘之餘遺骸歸海鹽之天寧葬于西齋而塔焉師故
所卜築退居自號西齋老人處也師學行高一世宗說兼通禪寂之外專
志淨業作西齋淨土詩數百首皆於念佛三昧心中流出歷歷與契經合
使人讀之恍然如游珠網瓊林金沙玉沼間也行業具宋學士塔銘及獨
菴少師西齋和尚傳中

懷淨土詩八首原一百十首

幾回夢到法王家來去分明路不差出水珠幢如日月排空寶蓋似雲霞
鴛鴦對浴金池水鸚鵡雙銜玉樹花睡美不知誰喚醒一爐香散夕陽斜
淨土真爲不死鄉雲霞影裏望殘陽珠樓玉殿空爲體翠樹金花密作行
款款好風搖菡萏依依流水帶鴛鴦分明記得無生曲便請知音和一塲

山雲靄靄水泠泠共說西方一卷經石虎却來巖下嘯泥人先往樹間聽
風飄陽焰隨波散雨浥空花逐蒂零極樂此時堪駐足彌陀何處不流形
故鄉別早話歸遲何待君言我自知客路於羸無一好人生惆悵不多時
蒼顏歷歷悲明鏡白髮斑斑愧黑絲再讀南屏安養賦屋梁落月見丰安
人生百歲七旬稀往事回觀盡覺非每笑同流何處去閒拋淨土不思歸
香雲瑪瑙階前結靈鳥珊瑚樹裏飛從證法身無煩惱況餐禪悅永忘飢
一帶雲山一艸堂一瓶淨水一爐香心融有念歸無念日課朝陽到夕陽
紅杏雨餘春正好白蓮風細夏偏長假饒劫火燒千界不動吾家聖道場
蓮宮只在舍西頭易往無人著意修三聖共成悲願海一身孤倚夕陽樓
秋階易落梧桐葉夜窴難藏荊艸舟幸有玉池鳬雁在相呼相喚去來休
吾身念佛又修禪自喜方袍頂相圓曾向多生修福果始依九品結香緣
名書某甲深華裏夢在長庚落月邊濁惡凡夫清淨佛雙珠黑白共絲穿

懷淨土百韻詩

欲生安養國承事鼓音王合掌須西向低頭禮彼方觀門誠易入儀軌信
難量佛願尤深廣人心要久長夢見思乳母遠客望家鄉鄭重迎新月殷

勤送夕陽分明蒙接引造次莫遺忘飲啄齋耕首熏修策最良五辛全耕
斷十惡永堤防勿用求名利毋勞論否臧布裘遮幻質蓁蓁塞空腸罷
多生債枝梧九漏囊精神纔懶慢喜怒便搶攘水滴俄盈器江流始盈觴
積來功行滿趁取色身強重置千華座鑪焚百種香新衣經獻著美饌待
呈嘗莫點殘油炬宜放浴像湯形骸同土木戒檢若冰霜想念離諸妄如
跌在一牀剎那登淨域方寸發幽光骨肉都融化乾坤極杳茫太虛函表
裏佛刹據中央蓮吐葳蕤華波翻激滌塘鮮麗須動蕩綵仗恣搖颺燦爛
黃金殿參差白玉堂樓隨四寶合臺備七珍粧鏡面鋪階砌荷心結洞房
珊瑚裁作檻瑪瑙製爲梁田地琉璃展園林錦繡張內皆陳綺席外盡繞
銀牆覆有玲瓏網平無突兀岡瑠璃林連處處琪樹列行行果大甜如蜜音
清妙似簧喬柯元自對茂葉正相當一一吟鸚鵡雙雙集鳳凰瑤池無畫
夜珠水自宮商渠瑩金沙底風輕寶岸旁高低敷菡萏深淺戲鴛鴦異彩
吞群鳥奇葩掩衆芳千枝分赤白萬朵間青黃暫挹身根爽微通鼻觀涼
頻伽前鼓舞共命後飛翔竟日鶯調舌冲霄鶴引吭悟空寧有我知苦悉
無常大士談玄理聲聞會寶坊經宣十二部偈演百千章直指菩提徑俱

浮般若航挽回尋劍客喚醒失頭狂九品標龍妙三乘互抑揚鍊深終絕
鑄鍊淨豈存懺示現真彌勒客參妙吉祥聖賢雲纓難天樂日鏗鏘俊傑
純童子伊優絕女郎語言工問答進退巧趨鎗火齊恒流煥摩尼並耀芒
不須懸日月何處限封疆食是天餽饍食非世稻粱挂肩如意服掌鉢自
然樂脫體殊清淨含暉更焜煌架梁籠瑞靄瓊瑤視仙裝徧徃微塵國周
遊正覺場慈顏容禮覲供具任持將側聽能仁教還令所得亡及歸彈指
頃翻笑取塗忙每受經行樂誰云坐卧妨普天除闕譯匝地息災殃南北
威靈被東西德化彰爰番經劫燒四海變耕桑此界無虧損斯人但壽昌
戶丁休點注年甲罷推許滿耳唯聞法克飢不假糧永懷恩人髓且
侵瘡試說娑婆苦爭禁涕泪滂內宗誰復解邪見轉堪傷忍被貪嗔縛甘
投利欲坑君臣森虎豹父子劇豺狼儘愛錢堆屋仍思米溢倉山中搜雉
兔野外牧牛羊奪命他生報銜冤累世償太平逢盜賊離亂遇刀鎗好
耽盃酒迷情戀市娼心狠拋胃索意馬放垂韁逸志摧中路英雄赴北邙
干戈消禮樂揖讓去陶唐戰伐愁邊鄙焚煙徹上蒼連村遭殺戮暴骨滿
城隍鬼哭天陰雨人悲國天殤歲凶多餓死棺貴少埋藏瓦礫堆禪剝荆

榛出教庠征徭兼賦稅不忝減豐稷念佛緣猶阻尋經事亦荒素襟龍奮
迅高步鵠騰驤載顧同群雁毋爲獨踈羣聖胎吾已就法侶爾相望實地
同瀟灑金臺共頡頏翹勤山岌業積德海汪洋曠劫功彌著纖毫過卽穰
三心期遠到十念整遙裝必欲超魔界從今奉覺皇

和淵明九日閒居詩

閒居愛重九使我念陶生但取杯中物不貪身後名季秋霜始降向晚月
初明草際亂虫語林梢殘葉聲疎籬采叢菊小嚼扶衰齡美酒旣滿樽一
吟還一傾田園自可樂圭衮何足榮貴賤各有志好惡吾無情所以君子
懷悠哉歲功成

和淵明仲秋有感

皇天分四時白露表佳節最愛潭水清猶如鏡容徹蟾蜍出復沒絡緯聲
欲絕靜臥深夜起仰觀衆星列流水可嗟吁附勢非俊傑身卽大患本家
無長生訣且餐籬下菊兼吸杯中月

和淵明新蟬詩

新蟬何處來鳴我高槐陰流水欲入屋好風自開襟林頭一束書壁上三

尺棊聚以散哀樂書以通古今所幸車馬稀非邀里人飲虛名如北斗
酒不能斟縱洗爰君耳寧知鐘鼓音陶潛初解組蘇軾未投簪莫改塵
性常懷煙嶂深

送哲禪人杖錫訪師兼簡仲默和尚

杖錫老師七十八眼如點漆眉如雪分明畫出須菩提坐聽孤猿吟落月
深山古寺天正寒葉深一尺堆牀前地爐燒火簾不捲袈裟黑似鑪中烟
客來只恐放煙出爭奈山林藏未密喧喧道價滿江湖負笈挑囊固非一
千里東歸頻寄聲乃翁終似有鄉情目連驚子神通妙何必區區圓相成

君子交行并序

呂日新與予相知最早先後來京師作君子交行以贈之

君不見車輪碾地不碾塵塵暗却遮車上人又不見馬口吸泉不吸月月
明豈解心中渴所以君子交毋爲小人絕

海東青行

海東青高麗獻之天子庭萬人却立不敢睨玉爪金眸鉄作翎心在寒空
轉在手一生自獵知無偶孤飛直出大鵬前猛志豈落駕鸞後是日霜風

何栗冽長楊樹羽看騰臂奔雲突霧入紫霄夜兎妖墓灑丹血束身歸來
如木雞衆鵲欲並功難齊介輩無材空碌碌不應但費官厨肉

春日花下聽彈琵琶效醉翁體

僕本南海人暫爲北京客朝遊金張園暮宿許史宅二月春風吹百花朱
朱粉粉相鉤加銀鞍繡勒少年子對花下馬彈琵琶大絃掩抑花始開花
重墜枝枝更斜小絃變作花爛熳雨點驟打烟濃遮鷓鴣從何來遠在天
之涯鉤輈格磔忽驚起不知飛在誰人家又聞黃鸝聲睨睨如斷復續續
復斷布指似嫌宮調緩別寫群雁鳴霜暖蒹葭浦深風蕭蕭一隻兩隻飛
漸高天長地遠望不見使我回首心煩勞我謂少年彈且止錢塘去國二
千里每到春來花最多鷓鴣能舞黃鸝歌去年隨雁同沙漠聽此琵琶殊
不樂少年笑我君太癡人生行樂須其時此中正自有佳處但畏閒愁纏
繞之

北邙行

請君停一觴聽我歌北邙北邙在何許乃在洛之陽洛陽城中千萬家無
有一家免亂亡天地開闢來死者生之常遠如上古諸皇帝卒棄四海歸

山岡富貴浮雲亦易滅筋骸化土誠堪傷漢陵發掘竟何事後世更留珠
玉裝而況將相墳不爲荆杞荒野火燒林斷碑碣牧童見草呼牛羊當其
得志時直欲凌雲翔天子不敢忤群臣非雁行嬌兒聰明尚貴主愛女秀
麗專椒房昨日鑄印大如斗今日臨軒封作王風雷起掌握瓦礫含輝光
權勢有時盡亂衰無處懷嬌兒愛女替不得點點血淚沾衣裳白馬素車
出門去未知魂魄遊何鄉土梟飛來樹梟梟石獸對立烟蒼蒼萬歲千秋
共一盡高堂大宅空相望

漠北懷古

四首西燕漠北開平諸詩皆前元時作

曠野多遺骨前朝數用兵烽連卻護府柵遶可敦城健鶻雲間落妖狐塞
下鳴却因班定遠牽動故鄉情

北向無城郭遙遙接大荒舊來聞漢土前去是河隍野蒜根含水沙蘼葉
負霜何人鳴腐粟使我淚沾裳

每厭冰霜苦長尋水草居控絃隨地獵剝木近河漁馬酒茶相似駝裘錦
不如胡兒雙眼碧慣讀左行書

無樹可黃落有臺如白登三冬掘野鼠萬騎上河水土厚不爲井民淳猶

結繩令人思太古極目眇平陵

上都三首

避暑宜來此逢冬可住不地高天一握河雜水長流赤日不知夏清霜常似秋向來冰雪窟今作帝王州
王畿千里近御苑四時春首蓂能肥馬葡萄不醉人袞衣明日月關塞絕風塵古有官名諫今無事可陳
雙闕上雲霄層城近斗杓夜開金殿鎖晨赴紫宸朝月屋閒浮蜺霜空好射鵰有官兼宰相誰復似嫖姚

開平書事六首

舊俗便弓馬新妝稱綺羅平原芳草歇古戍暮雲多翠袖調鸚鵡金鞭控駱駝上樓看月色無酒奈君何
絕域秋風早殊方便客還河衝秦日塞地接漢時關萬古悲青冢兼程過黑山從容陪國論咫尺近天顏
地勢斜臨北河流穩向東龍庭行萬里虎路達三巘胡女裁皮服奚兒控角弓長吟對落景獨坐感飛蓬

北海何人到西天此路通尋經舍衛國避暑醴泉宮盛夏不揮扇平時常
起風遙瞻仙仗簇復有彩雲籠
夜雪沙陀部春風敕勒川生涯惟釀黍樂事在彈弦不用臨城將何須負
郭田雙鵬來海外一箭落天邊
野外山橫塞天涯水遶羌登高一俯仰卽事幾炎涼日晚鵬聲急冰寒馬
足傷我懷增感慨誰與細平章

萬里

萬里故鄉隔扁舟何日還黃雲薊北路白雪遶西山馬倦客投店雞鳴人
出關吾思石橋隱絕頂尚容攀

西津

月滿潮來盛天空野望低樹侵吳甸北帆入楚江西俊鵬秋方下慈烏曉
更啼卽看霜露及風景色淒淒

贈江南故人

今騎沙苑馬昔踏洞庭魚結纜街邊宿移家竹裏居好風橫笛晚新月上
簾初舞憶江南樂功名有不如

燕京絕句八首

飛鸞不與鳳爲儔，養子黃金屋上頭。
山雀野雞俱入饌，此禽巢穩獨無憂。
漆園山下塋車塵，冷水潭邊拜掃人。
一種白楊千萬葉，空令兒女淚沾巾。
昔者昭王未築臺，應無樂毅劇辛來。
英名萬古垂霄壤，不惜千金養俊才。
始入彤庭又捲班，何心拄笏看西山。
鷺鷥遇對鸕鶿語，我與漁翁一樣閒。
前日來看普慶花，今朝零落委泥沙。
如何富貴爲天子，不欲重生司馬家。
小入藜莧便克腸，丞相何須一萬羊。
賓客餘餐到僮僕，不知金紫是愁囊。
玉帶金符樓上鐘，有材長恨不遭逢。
一年一度桃花浪，身是凡魚未化龍。
閒居彌勒且同龕，酒價錢緡兩不諳。
荀蕨正肥何處好，春風春雨憶江南。

居甯關

天畔浮雲表峯北，遊奇險見居庸力。
排劍戟三千士，門掩山河百萬重。
渠谷自今收戰馬，兜鈴無復置邊烽。
上都避暑頻來往，飛鳥猶能識袞龍。

琴峽

目送歸鴻手五絃，嵇康合向此中仙。
水如玉指彈秋月，星作金徽散曉天。
盡洗伊涼方可聽，不名韶濩若爲傳。
君王莫愛霓裳曲，豔舞嬌歌失自然。

獨石站西望

塞北逢春不見花江南倦客苦思家
千尋石戴孤峯驛一望雲橫萬里沙
去路多嫌葱嶺礙歸途半受雪山遮
張騫往往遊西域未許胡僧進佛牙

群公子樂府

少年意氣向誰傾閒把琵琶出鳳城
染草未勻春色嫩勒花不住晚寒輕
風飄十里香塵滿日照三條廣路明
灑掃東堂遊射處分驚亦是慰人情

相家夜宴

璧月未出金風涼群鳥啞啞鳴苑牆
西山高居帝左右北斗正挂天中央
繡衣執樂三千指朱火籠紗十二行
坐待更闌賓客散蕭齋自炷辟邪香

贈王使君

君將使節過繩橋已遣蠻夷感聖朝
良將未誇班定遠大臣猶數蓋寬饒
川香野馬銜青草雪暗天鵝避早鵬
西出陽關九千里歸來莫惜鬢蕭蕭

余嘗夢至一山聞杜鵑且約雪窓南還

出郭尋春未見春東華踏徧軟紅塵
不知蝴蝶化爲我何處杜鵑來喚人
筍蕨過時惟恐老櫻梅如豆正嘗新
及今無事早歸去莫待秋風江上尊

梁山泊

天畔青青蘆葉齊晚來戛戛水禽啼一鉤慘淡御山月五色彎環跨海霓
新摘蓮花堪釀酒舊聞荇菜可爲羹北人大抵無高韻零落校船傍柳隄

金山

半江湧出金山寺一簇樓臺兩岸航月轉中宵爲白晝水吞平地作青天
塔鈴自觸微風語難石長磨細浪圓龍化老人來聽法手持珠獻不論錢
曉渡西湖

船上見月如可呼愛之且復留斯須青山倒影水連郭白藕作花香滿湖
仙林寺遠鐘已動靈隱塔高燈欲無西風吹人不得寐坐聽魚蟹翻菰蒲
愚菴禪師及公

公名智及字以中吳縣顧氏子入海雲院爲童子見廣智訥公于建業與
張文穆路公危左丞以聲詩唱和同袍聚上人訶之端海雲見秋葉吹墜
于庭豁然有省謁寂照端公于雙徑端公以法器期之執侍左右聲光頓
超諸老上出世住兩浙大刹洪武癸丑詔有道浮屠十人集大天界寺師
居其首以病不及召對乙卯賜還海雲戊午九月示疾書偈而逝宋學士

叙四會語錄及撰塔銘以爲姑蘇山川清妍人物敏慧學禪那者據位稱
大師猶以攻文翰辨器物爲尚自朱季以迄于今提唱達摩正傳追配先
哲者唯師一人而已

悼楚石和尚詩三首

潦倒奚翁的骨孫高年說法屢承恩麻鞋直上黃金殿鐵錫時敲白下門
煩惱海中垂雨露虛空背上立乾坤秋風唱徹無生曲白牯狸奴亦斷魂
聖主從容問鬼神當機一默重千鈞茶毘直下金門詔火聚全彰淨法身
平地驚翻三世佛等閑瞎卻一城人大悲願力知多少枯木花開別是春
匡牀談笑坐跏趺遺偈親書若貫珠木馬夜鳴端的別西方日出古今無
分身何啻居天界弘法毋忘在帝都白髮弟兄空老大剎竿倒却要人扶

次韻寄開化一元禪師

厭看功臣樹色蒼故山端的勝殊方桑麻原隰連香徑金碧樓臺峙寶坊
淪雪小齋雲半榻貫花新偈入千行春深四大輕安否佛祖權衡賴抑揚
師祖善權元翁和尚忌辰

爲愛團圓十畝園紅芳消後綠陰連杖藜日涉真成趣野菜時挑不費錢

臨濟栽松親鑿地仰山種粟自燒田祖翁活計誰相委獨立南榮爲惘然
次韻荅夢堂法兄

兵戈南北競喧爭兄弟分違似隔生瀛海丹山君宴坐劫灰雙徑我徒行
只添東籬眼間重依舊眉毛眼上橫賴有祖翁家活在不妨日午打三更
荅東臯伯遠法師

東臯尊者門郊墟小小房蘇睹史居切柏代香期演法卷簾進月夜抽書
村園果熟秋霜落花徑苔生宿雨餘心境兩忘諸幻滅更于何處覓真如
示壽知客

開先寺裏迎賓日禪月
前索倡時客路如天春似海子規啼斷落花枝
全室禪師泐公

宗泐字季潭臨海人族姓周氏上始能坐輒踟蹰八歲從中天竺笑隱訢
公學佛二十受具從智開山于龍翔寓意詞章尤精隸古虞文靖黃文獻
張路公皆推重爲方外交洪武初高皇帝召面白金公問鬼神事詔舉
高行沙門師居其首建普度大會於鍾山命製讚佛樂章復說法超度迷
溺太祖臨筵嘆美命住天界屢駕臨幸召對內庭賜膳無虛日復賜和

平日所作詩一紙註心經金剛楞伽三經行世十一年太祖以佛書有遺
佚命領徒三十餘人往西域求之十五年得莊嚴寶王文殊等經還朝開
僧錄司授右街善世因長官奏事獲譴往鳳陽槎峰建寺三年訖工天界
寺火以興復爲已任奏重建于聚寶門外二十三年詔再住天界諭云一
百廿歲永鎮綱宗廿四年復領右街善世居無何奉旨佚老歸槎峰上曰
寂莫觀明月逍遙對白雲汝其往哉乃絕江至江浦石佛寺示微疾留三
日沐浴念佛泊然而寂世壽七十四夏六十建塔天界附廣智塔右泐公
初以度牒事論死詔宥之往西天取經歸後十年僧智聰坐交結胡丞相
謀逆詞連公及復見心謂公往西域丞相屬令說土番舉兵爲外應公就
訊輸服如聽言有司奏當大辟奉欽依免死着做散僧太祖御頒清教錄
僧徒坐胡黨條列招詞者六十四人咸服上刑惟公一人得宥塔銘所云
佚老槎峰正着做散僧之日也詩文有全室外集十卷以欽和御製詩爲
首

戰城南

進兵龍城南轉戰天山道烽烟漲平漠殺氣霾荒徼將軍重爵位天子尚

征討不辭死，多但恨生男少。

空城雀

啾啾空城雀，戀戀空城曲。朝傍空城飛，暮向空城宿。草窠乳子成，埽土翻身浴。不隨鳳凰遊，不畏鷹鷂逐。野田豈無黍，太倉豈無粟。食粟遭網羅，食黍傷箭鏃。丁寧黃口雛，飲水懷止足。歲晚雖苦飢，全軀保微族。

風入松

高堂初宵，山月明長松。颯颯奏清聲，清聲希微，坐獨聽援琴，細意寫得成。調絃轉軫，聲方起，忽覺松風生。繞指更深，鬼哭巖前，雲夜半龍吟。潭中水一彈一奏，聲緩促，有似松風時斷續。含商流徵，清復哀，能使幽人聽不足。聽不足，琴瑟忽罷。此時寂寂，松無風，明月滿天涼露下。

俠客行

平生重然諾，意氣橫高秋。拔劍悲風吼，上馬行報仇。報仇向何處，堂堂九衢路。突上秦王庭，直入韓相府。回身視劒鏑，血漬霜華薄。敢持一片心，爲君摧五岳。五岳卽可摧，此心終不灰。恥沒兒女手，完質歸泉臺。

交門歌

不其山頭月將午交門沉沉夜擊鼓博山火蒸凝絳烟霓旌導騎來容與
玉顏綽約含春花向坐分明君自覩君心有欲神不違側耳傾心聽好語
雲收雨散意不_一起望星河獨延佇明朝更入芝房齋神其相之復來下
茂陵新樹起哀_一五柞宮中淚如雨

江南曲

泛舟出晴溪溪迴抱山轉欲采芙蓉花亭亭秋水遠心非橋上帆隨風豈
舒卷但得紅芳遲何辭歲年晚

隴頭水

隴樹蒼蒼隴坂長征人隴上迴望鄉停車立馬不能去况復隴水驚斷腸
誰言此水源無極盡是征人流淚積拔劍斫斷令不流莫教惹動征人愁
水聲不斷愁還起淚下還滴東流水封書和淚付東流爲我殷勤達鄉里

春江曲

春江沉沉春水滿柳條拂水蒲芽短鴛鴦睡美不畏人口色遲遲素沙暖

古塞下曲

候吏過輪臺傳言敵可摧嫖姚揚旆出驃騎治兵來瀚海驚波涌陰山積

雪開前軍正酣戰日暮氣雄哉

銅雀臺

西陵樹色暮蒼蒼明月相將入御牀寂寞帳前歌舞歇幾人含涕憶君王

楊柳枝詞二首

百花洲畔覆青坡第六橋頭蘸碧波鳳管龍笙春寂寂綠陰終日伴漁歌
萬樹千株沐水隈春風青眼爲誰開錦帆曾拂中間過只到揚州竟不迴

祖龍歌行

祖龍迺好長生者沉璧徒來華山下目斷樓船海氣昏鮑車亂臭沙丘野
驪山下銅三泉開泉頭宮殿仍崔嵬當時輪作方壺臺函谷無關小龍死
百尺降旗軹道傍十二金人淚如水

長安少年行二首

日晚新豐醉酒迴玉鞭敲鐙萬人開綠槐馳道橫穿過不管金吾宴騎來
翻雞蘇得海東青臂向東街覓弟兄白馬翩翩相逐去灞陵原上曉雲平

從軍行

拾骨當炊薪淘屍作泉窟平野不見人寒雲雁飛沒悄悄橫吹悲梅花爲

誰發

天雨雪

天雨雪出門何所之渡河正遇風浪惡回船少住溪水涓舉頭見飛鳥歛
翩欲下無樹枝

楚妃歎

宮城禁兵夜簇簇君王不返宮中宿戎車彭彭雲夢林獵火煌煌漢臯曲
章華臺前江水流君心如水平無日休虎狼勅敵却不憂草間狐兔爲深讎

姑蘇臺歌

姑蘇臺上麋鹿遊吳江水映西山秋館娃宮樹迴不見落日荷花今古愁
向來豪客層樓櫓醉擁吳姬夜歌舞齊雲易逐浮雲飛鬼火三更照寒雨
登高丘而望遠海

登高丘望東溟溟水方蕩激中有怒吼鯨鯨脊類峰嶽鼓浪如雷霆
噴沫雲霧冥揚鬚掉尾三山傾腹吞巨舟者百十蝦蟹不足飢腸撐奈何
驕悍當海橫官漕賈舶不敢行鮫人織綃機杼停神仙踞居蓬瀛天吳
既碎易龍伯亦震驚徒爲蟲族長空有水神名制御一顛倒含羞請尋盟

吁嗟彼鯨爾何粹恃其險惡雄勢成若失此海水何以藏其形使居陸阜
間轉眼遭剝烹海濱壯士瞋目瞪拔劍欲往心懸旌曷不訴之於上帝天
威下殛無遺生立見海水清且平海光不運青瑤瑤
此詩爲方谷真作亂前元失計招撫而作

墓上花

墓上花開滿枝行人看花行爲遲行人有恨花不知不生名園使人愛却
生墓上令人哀誰家此墓臨古道寒食無人來祭掃真是東君惜無主遺
此閒花伴幽兆聊持一杯酒酌爾泉下客今日此花開正好但恐明日花
狼藉人生似花能幾時古人今人皆可悲

道傍屋

道傍誰家有古屋主人不在行人宿門戶蕭條四壁空野草依然映階綠
春燕歸來細相認遶屋低飛疑不定徒令獨客久咨嗟無復高堂樂繁盛
一從兵火照坤維十家九家無孑遺願留此屋行人宿莫問主人歸不歸

三閣詞二首

複道麗明霞阿房未當奢半空傳笑語長夜後庭花

檻車出城去望閣暫回頭
昔之千年樂今成萬古愁

烏啼曲并序

天台王文起以故官例遷汴梁念其親老不得朝夕養思慕彌篤其寓邸旁有古槐樹俄群烏集啼其上久而弗去及文起以舍壞遷其居烏亦隨之其孝感有如此者予聞而異之遂作烏

啼曲一首

客舍門前古槐樹群烏啞啞啼不去烏啼解知人意苦遷客思親朝復暮五年生死無消息一聞烏啼淚沾臆汴水東流白日飛老親在南兒在北南地靈鵲北地烏烏啼報有平安書

寶訓堂

聖君體皇極建國封親王全蜀形勢地西南控戎羌劍閣天下壯象馬稱瞿唐保障千萬祀崇德乃安康昭鑒有嚴訓寶之靡或忘服御既有節出入亦有常上承宗廟重下垂胤祚長開門看天宇白日行穹蒼中宵卷簾坐仰視北斗光美牆契王意一飯在斯堂

喜清遠兄至用齊己韻

四首

因亂阻殊邦及見消往憶始愛道貌清復驚鬢毛白論新無少驢話舊有
深剗坐久忽忘言芳梅照寒席
前年剃僧來稍稍聞去就持斧住越山移幢入吳岫高居既隣支朗詠亦
依晝應世自無心麻衣澹如舊

良友平生親風塵散何許草莽或零落雲霄亦騫舉天地日淒涼折芳欲
誰與所嗟芙蓉花白露下秋浦

少年同居日聞君拂絲桐高齋月照席兩耳生松風當時青雲士奇文詠
空同往事春花歇江水今自東

懷以仁講師入觀圖

旭日千萬峰白雲三四朶一笑山容開獨自松下坐暴流天上來飛花面
前躋此時中觀成無物亦無我

冰雪窩

道人冰雪窩巖栖稱今寂洞門白日陰三徑青苔色片雲簷外生落葉階
前積更深芋火紅晝靜茶烟碧淡泊中自怡安居無不適彼美西方人時
時勞念憶

送鈺上人省親

青山澹斜暉驚風在高樹行客起遐思雙親髮垂素雲飛滄海還雁下寒
空暮老來惟夢歸隨君故鄉路

題五龍山房圖

剡中東南奇若人緇侶勝一住忽十年禪房得深靜高扉敞重崖脩檐入
危磴林端識名禪水際聞清磬微茫度雲縫掩映披華逕長松支遁吟盤
石墨猷定別來幾夢思遊塵生塵柄晨窗對新圖蕭條發孤詠

春雨吟

溪南有奇山不見二十日今朝雲忽去天高數峰出東風晚生寒細雨又
復密坐觀微霧昇化爲白練懸側想巖居人林臥頭不櫛崖滑徑且暗何
由采芝術

斷黃獨

雨歇林氣涼草淺潤西路荷鋪入深幽石邊欣遇長歌對白雪清風滿
山樹向來垂涕人遙遙千載慕

采芹

深浦芹生密淺渚芹生稀采蔬不濡足采密畏沾衣清晨携筐去及午行歌歸道逢李將軍馳獸春乘肥

雜詩

落葉委通衢紛然無人掃但覩新行迹不見舊時道古木依道傍亂藤絡其杪歲暮終青青終非本容好世人懷往途悟此豈不早振衣無後期來從漢陰老

風雪歸莊圖

山路獨歸翁手携一壺酒千林雪正深扁舟在溪口荻花闌石根垂蘿穿戶牖江城看圖人幾迴興歎久

暮過賞溪

日暮衆鳥歸孤雲亦還山市人爭渡息小舟沙際聞我屋西峰下半出青林間鐘聲動深念無爲尚塵寰

夏夜與錢子貞集西齋賦詩叙別二首

一見江海奇夙聞鐘鼎傲山客訝雄談本客爭清嘯悠悠鹿門期落落東海蹈咲問經世人大夢誰先覺

明月不可招流光入堂中白雲不可約挂我屋上松茲會固難得後會寧
易逢明朝在東郭隔水但聞鐘

奉和鍾彥基尊師待相空至

實公同門英論交二十載賦詩多新語亦足邁前代偶與仙翁言久別思
一會溪山入春明花鳥亦相待孤雲本無期行蹤定何在日暮倚東風疎
鐘起天外

分題龍宮寶石送陳庭學之官成都

成都山水區龍宮遺寶石苔蘚滋古文波濤含潤色驪珠化海榴神變安
可測想當聽經時雲寒夜堂寂蜀中天下險兵戈屢充斥城郭雖已非此
石尚如昔京華歲將闌萬里送行客時清衛府閒搜奇撫陳迹平生獨往
願蹉跎頭半白悵望西南天空懸遠飛翼成都唐高僧智常諱法華經
水造一明珠帝不愛珠化爲石今存焉

出峽圖

瞿塘水如馬五月不可下兩舟側處來披圖一驚詫前行稍趨平勢若閒
暇者後來方履險架篙不停把山廻古木披峽東哀湍瀉嗟爾獨舟人安

危在操舍

松下居偶作

我此松下居卽事良可悅閉戶留白雲開軒放明月松響風忽來泉流雨
初歇時有西齋人相親嘿無說

送僧遊廬山

廬山天下奇良遊遂平素江帆渺何之連峯散晴霧雲端五老人粲然風
骨露青衣或來迎木客時相遇夜坐松底石天燈知幾處忽聞岩際鐘忘
却東林路

夜坐雜言次韻二首

老來百念忘外緣何用展_卷月坐更深和雲臥峯頂青燈靜照壁白髮倒
垂領尚懷分芋人寒品甘息影
明月出東嶺照我窗牖間群動夜方息白雲亦孤還緬思支道林沃州曾
買山遠公竟不出逸駕安可攀

再用韻

孤燈坐二更茶具獨未屏春寒逼清明袖帽猶在頂太音本無聞含笑祇

自領月上僊亦來窓前弄林影

偶地居

偶地卽吾廬絕勝樹下宿不在千萬間安居心自足古人三十年辛勤乃有屋我無一日勞何必較遲速燕坐白日閒青山常在目明月到牀前更深代明燭凡有寒山詩興來時一讀十日不出門滿階春草綠

冬夜憶清遠道初二兄

夜深霜氣寒窗月皎如燭鳴鴻尚遐征孤鶴亦驚宿念我平生親悵焉連心曲四明是何處茗溪如在目異方詎能通遠道何由縮十年無一字信是如金玉白髮漸欺人晤言安可卜

贈安古心還山中

千來能幾時遽有還山想長笑輕別離一策晨獨往舊房青淵阿夜雨新泉響門前嘉樹林陰陰夏條長卽此人事絕遂爾長偃仰得句林花開彈栗山月上蕭散世念疎澹泊道心朗白駒空谷中誰能復羈鞅何彼名利人勞生在天壤

秋鷺歌

千林入秋露氣清林中尚有黃鸝聲似與群蟬爭意氣東林飛過西林鳴
向來春風花滿城柳條拂地如長纓綿綿蠻蠻斷復續千人萬人側耳聽
高樓半醉客閣艤停吹笙白馬貴公子挾彈不敢驚此時胡爲不喜聽奈
何節序移人情只合深藏絨爾口亦有妬爾金衣明反舌無聲良久伯
勞布穀俱潛形秋鷺秋鷺爾能翻然入幽谷老翁歌詩送爾便覺心和平
淮之水送別

淮之水向東流水流只載行人舟舟行如飛水如射一日可到吳江頭何
不載此離情去擲向天涯不知處濠梁有客今白頭望斷孤雲海天暮

重荅夏本心

有約何曾至無期却自來煖憐沙上日清愛竹邊梅山鳥當葉几溪雲對
茗杯桓公遺廟近乘興一追陪

贈立恒中

海外赴商船江東住幾年華音雖已習鄉信若爲傳一鉢隨緣飯諸峰到
處禪涼秋明月夜夢度石橋煙

夢清遠兄

殘夢夜將晨分明見故人劇知情是妄翻說夢成真日月容顏老池亭吟語新三年消息斷江漢尚風塵

登多景樓

水際一峰出飛樓倚次寥烟雲連北土風物見南朝山勢臨淮盡江聲入海消偶來登眺客凭檻興偏饒

送徐伯簾歸南陵

把酒城南道離懷去住同鳥啼紅樹裏人在翠微中山雨添秋色溪雲渡晚風倚樓相憶處明日各西東

州別集詩爲庚申帝作尤謬

與徐伯廉再往南陵

又向南陵去復携良友同人煙千嶂裏客路百花中雉雛初晴日鶯啼滿樹風漸知精舍近清磬出林東

入孤澗有作

谷裏何人住山腰有徑通老猿時挂樹好鳥自吟風古澗寒泉碧連山夕燒紅隱居慙未遂明日片帆東

西關爲修師作

春茲山閣小獨住一閒僧座冷浮青霭虛挂碧藤禽翻寒鉢水鼠飮夜
窗燈愛爾不能懶時時爲一登

送王叔潤

平涼來又去官滿復之官塞晚黃雲合邊秋白草寒有儲諸將喜無松遠
人安萬里關山月吟詩獨自看

登相國寺樓

冬日大梁城郊原四望平雲開太行碧霜落蔡河清欲問征西路兼懷吊
古情夷門名尚在無處覓侯嬴

落葉

一片復一片西風與此風但看階下滿不覺樹頭空綬服猶堪用題詩自
不工山童朝更掃間委古牆東

發扶風

曉發扶風縣雲低欲雪時長河王莽寺獨樹馬超祠營窟炊烟早牛車度
坂遲非熊無復夢渭水自逶迤

南澗

携友過南澗，槎橋類斷虹。
鳥啼青嶂外，麋臥綠陰中。
繒笠迎秋雨，樵歌落晚風。
謝公雙屐健，獨往杏林東。

深居

山崦入重重，誅茆第幾峰。
四簷青樹合，一徑白雲封。
夜冷齊腰雪，春陰被額松。
自來深處住，樵客不相逢。

朝來

朝來暑氣清，疎雨過簷楹。
徑竹欹斜處，山禽一兩聲。
閒情聊自適，幽事與誰評。
几上玲瓏石，青蒲細細生。

錢塘懷古二首

欲識錢塘王氣徂，紫宸宮殿入青蕪。
朔方缺騎飛天塹，師相樓船宿裏湖。
白鴈不知南國破，青山還傍海門孤。
百年又見城池改，多少英雄屈壯圖。
天地無情日月徂，鳳凰山下久榛蕪。
獨憐內殿成荒寺，空見前山映後湖。
塞北有誰留一老，海南無處問諸孤。
蓬萊閣上秋風起，先向燕京入畫圖。

送王惠芳之金陵

涼風一棹送君初。秋雨荒溪草樹疎。十載丹陽舊游地。數封燈下故人書。
已看有志能投筆。豈謂無門可曳裾。後日天邊見鴻雁。憑將消息報何如。

滿郭子莊之南昌

昔觀王粲登樓賦。近識林宗墊角巾。淮上小山千里夢。江南芳艸十年春。
來尋松院棲雲客。去作轅門草檄人。明日天邊一回首。涼風吹老賞溪蘋。

登峩眉亭

千尺蒼厓一小亭。大江東下入滄溟。磯頭牛渚從來險。天際峩眉不盡青。
南北山川分歷歷。荆吳檣艦去冥冥。十年兵後重來客。獨倚闌干兩鬢星。
和程續古秋日見過兼次韻

上方高處古禪關。一曲清溪萬疊山。松樹不嫌僧共老。菊花應笑客能閒。
而風岸口孤帆轉。落日林邊獨鳥還。一自兵餘行樂少。且須今日盡歡顏。
入標山寫呈無極老禪

干戈擾擾客難禁。避地來依碧嶂深。亂裏獨驚浮世事。難中多見故人心。
千章古木群峯合。一徑長松十里陰。更欲移茅入重崦。白雲無路可追尋。
和張光弼留別

老來心事向誰論且對青山酒一樽
湖上夢醒思舊將江西書去問諸昆
可憐漢祖今無廟還喜留侯尚有孫
手把過眉筇竹杖與僧閒步出松門
送福長老

五載西行同苦辛扶持老病最情真
千山雨雪獨騎馬萬里沙場不見人
京國歸來天闕近鄉間去建法幢
新今朝相見仍相別目斷孤雲碧海濱
和蘇平仲見寄

西去諸峰千萬層
帳房牛糞夜然燈
馬河只許皮船渡
戎地全憑驛騎乘
青蓋赤旛迎漢使
茜衣紅帽雜耆僧
愧如玄奘新歸洛
欲學翻經獨未能
題厓瀑圖

飛瀑洒寒水危梁跨碧層
天涯圖裏看頭白未歸僧

晚涼

晚涼池上亭坐來心似水
雨過竹林青風吹豆花紫

山景

孤邨帶寒鴉遠山涵夕霧
渡頭人未歸落日風吹樹

水竹居圖

山人水竹居圖圖看更好十年不歸來茅屋秋風老

秋江送別

江頭楊柳樹秋雨更蕭蕭可惜長條盡那堪折短條

蓮社鍾

方深區內緣久負社中約惆悵暮鐘聲徘徊度林薄

梅花莊水軒望清遠不至

望君水軒西恨殺前村樹日暮溪雨來扁舟在何處

巖潭道中

古水灣頭漁艇夕陽山下人家風起一溪白浪秋來滿路黃花

山中小景

四山一片秋色埜客獨坐茅亭渡頭紅葉如雨石上長松自青

次韻錢塘懷古

山川形勝說錢塘海接江流入混茫百五十年成底事一丘衰草委秋陽

暑夜

此夜炎蒸不可當開門高樹月蒼蒼天河只在南樓上不借人間一滴涼

吳松江逢清明

吳松江上看春雨客路扁舟三月行兩岸人家插楊柳不知今日是清明

題宋徽宗山鵲圖

落日黃塵五國城中原回首幾含情已無過雁傳家信獨有松枝喜鵲鳴

徽宗雪江獨棹

良岳秋深百卉腓胡塵吹滿袞龍衣淒涼五國城邊路得侶寒江獨棹歸

送人歸南昌二首

紅顏白髮映青袍三十年前白下橋亂後重逢天竺寺相看如夢說前朝
故人多在大江西欲寄封書懶不題昨夜東風吹夢斷曉來無賴是鶯啼

題蘭

溪寺曾栽數十叢紫莖綠葉領春風年來蕭艾過三尺白首看圖似夢中

偶作

竹外茅齋橡下亭半池蓮葉半池菱匡床曲几坐終日萬疊青山一老僧

山水圖

綠水青山茂苑西荷花開徧越來溪漁郎蕩漾灣頭去五月深林謝豹啼

題面

閒門寂寂掩芳春
坐看梨花帶雨新
鳥自白頭渾不覺
可堪啼向白頭人
觀吾子行別仇山村詩作絕句
吊之子行詩云劉伶一鋪事徒然

蝴蝶飛來別有天
欲語太玄何處問
西泠西畔斷橋邊

吹簫人去竹房空
海內猶憐翰墨工
最是西泠橋畔路
淡烟疎柳夕陽中

雪嶺

華夷分壤處
雪嶺白嵯峨
萬古消不盡
三秋積又多
寒光欺夏日
素綵爍天河
自笑經過客
相看鬢易皤

登靈鷲山

茲山如鷲形
昂然欲騫翥
稽首天人師
浩劫長此住
山中數招提
窓戶散煙霧
勝流不起席
鐘鼓自朝暮
下有王舍城
民俗尚淳古
所嗟給孤園
民俗已非故
吾生一何幸
良游遂平素
一笑天風生
白雲掩高樹

抵雞足山

大哉聖人化
萬古垂休經
自非上智士
何由得其精
飴光受遺命
傳衣表相承
持之入大定
坐待慈氏生
石崖開復合
人天護幽局
煌煌窳堵波
白

日輝觚稜魔來不得毀斧跡尚縱橫驚峰北指秀道初當前青再來曠無
日回首雲冥冥

宜八里國王遣使至館所慰問

白晝樓居靜王人忽到門有香聊款坐無譯自忘言纓布纏頭闊檀膏點
額繁客懷勞慰問此意竟難諼

仲春宜八里國道中

芭蕉葉開大如席石榴花發紅滿枝子規何似苦啼血正是行客東還時
重到別利迦竹園舊館

到此已三月重來如故居門臨外道院壁有中華書獮挂雨晴後鵲啼月
上初國君欲留住不省意何如

望河源

積雪覆崇岡冬夏常一色群峰讓獨雄神君所栖宅傳聞嶰谷篁造律諸
金石草木尚不生竹產疑非的漢使窮河源要領殊未得遂令西戎子千
古笑中國老客此經過望之長太息立馬北風寒回首孤雲白
河源出自抹必力赤巴山番人所貴河爲其虞麓牛河爲必力處赤巴

者分界也其山西南所出之水則流入龍牛河東北之水是爲河源予
西還宿山中嘗飲其水嘗人戲相謂曰漢人今飲漢水矣其源東抵崑
崙可七八百里今所涉處尚三百餘里下與崑崙之水合流中國相傳
以爲源自崑崙非也崑崙名麻律刺其山最高大四時常雪有神居之
番書載其境內祭祀之山有光此其一也并記之

到河州

自發烏思國於今數月過雪中臨黑水水上渡黃河裘覺青貂敝經煩白
馬馱玉關生得入定遠喜偏多

蒲菴禪師復公

來復字見心豐城人族姓黃氏禮南悅楚公爲師蚤有詩名游燕都親炙
虞文靖公歐陽文公諸君子與張潞公交尤厚元政不綱遂航海至鄞於
雙林之定水寺止焉洪武初與泐季潭用高僧召至京上詔侍臣取其
詩覽之褒美弗置賜金襴袈裟蜀王椿最賢上所鍾愛命儒臣李叔荆蘇
伯衡及師與之論道蜀王最重師命撰正心觀道崇本敬賢四箴榜于宮
除授僧錄寺左覺義詔住鳳陽槎芽山圓通院二十四年山西太原獲胡

常僧智聰供稱隨泐季潭復見心往來胡府合謀舉事見心坐凌遲死年七十三野史載見心應制詩有殊域字觸上怒賜死遂立化於階下田汝成西湖志餘則云逮其師所笑隱旋釋之見心應制詩載在皇明雅頌初無觸怒之事而笑隱爲全室之師入滅于至正四年俗語流傳可爲一笑也公詩文有蒲菴集洪武十二年其徒曇鑑釐爲十卷宋學士爲之序元季之作見賞於道園諸老者此集皆不載歐陽文公管序其文曰由唐至宋大覺璉公明教高公覺範洪公以雄詞妙論大弘其道於江海之間一時老師宿儒若我先文忠公及韓琦蘇軾莫不斂衽歎服皇元開國若天隱至公晦機熙公倡興斯文於東南一洗咸淳之陋趙孟頫袁桷諸先輩委心而納交焉晦機之徒笑隱所公尤爲雄傑其文太史虞集管序之矣所公旣寂叢林莫不爲斯文之慨翰林修撰張翥索示豫章見心復公所爲文以敏悟之資超卓之才禪學之暇發爲文辭抑揚頓挫開合變化隨乎若春雲之起于空也皎乎若秋月之印於江也邇而上之卓然並驅于嵩璉諸師無媿也蒲菴之文爲歐公所推重如此故詳著焉

大士受齋龍伯宮長驅蛟鰐爭先雄舳艫蔽天不敢渡水夷伐鼓洪濤春
騰身何來歷汗漫無乃變幻多神通兩僧後顧冰雪容浮蕙近隨赤鯁公
雲端噓氣作樓閣赤日照紅青芙蓉中有四鬼昇一翁雪眉垂領衣露胸
海神候謁旌旆從赤珠吐蹴流星虹跨鰲之安壘而癢手扶七尺邛州節
是誰彈舌呪老龍火鬚電鬣燒雲紅五輪舒光迸五色一葦直渡猶行空
前登頗枝定初起欠伸展臂來清風蹋躡躡魚走百怪擔簦負笈越群童
入山咫尺見臺殿彷彿微聽青林鐘開圖對我若舊識便欲巢我雲門松
世間浮榮日萬態過眼聚散空花同誰知神變亦虛幻徒逞狡獪驚盲聾
何如乘願降跡問浮中法雷大震開群蒙王城分衛飽香積坐令四海歌
時雍

次韻張仲舉承旨題盧楞伽過海羅漢圖

僧伽神變妙莫窮去住隱顯如旋風能令大海作平陸超然獨脫閻浮中
山君河伯備洒掃錫飛錫度雲行空安禪不避魔鬼窟受齋直入龍王宮
文犀赤豹時作伍玄猿白鹿日與同騰光噓氣閃奔電天鼓震服驚雷公
世人雖呵小乘法誰獨高舉隨雲龍我昔衡山問方廣石橋每見狀經童

天妹散花跪愛膝金盃咲捧明珠紅開圖恍忽觀顏色山海遙隔精靈通
那知画者有深意丹青巧奪造化工君不聞幻游天地同旅泊我身安得
駕鶴從西東

明侍郎所藏會稽王冕梅花圖

會稽王冕雙頰愛梅自號梅花仙豪來寫遍羅浮雪千樹脫巾大叫成
花顛有時百金開買東山屐有時一壺獨酌西湖船暮校梅花譜朝誦梅
花篇水邊籬落見孤韻恍然悟得華光禪我昔識公蓬萊古城下臥雲草
閣秋瀟灑短衣迎客懶梳頭只把梅花索高價不數楊補之每評湯叔雅
筆精妙奪造化神坐使良工盡驚詫平生放蕩禮法疎開口每欲談孫吳
一日騎牛入燕市噴目怪殺黃髯胡地老天荒公已死留得清名傳画史
南宮侍郎缺石腸愛公梅花入骨髓示我萬玉圖繁花爛無比香度禹陵
風影落鏡湖水開圖看花良可吁咸平樹老無遺株詩魂有些招不返高
風誰起孤山道

送吳知府之官雷州

雷州太守東吳客儒術傳家尚清白金花束帶紅錦袍玉骨峴峴眼雙碧

讀書昔在茗溪陽十年不出芙蓉莊娛親堂上譙春色銀絲作鱸冰雪香
丈夫干時須食祿有志匡君貧亦足誰能碌碌困一鄉冷炙殘梧媚豪族
剖符今作炎海遊江風吹上沙棠舟好山南去六千里豈無斗酒消離憂
牽牛花開暗蠻浦雨後怒龍如瀑布生黎紫口瘴茅青百尺黃蛇畫當路
此邦稍覺風俗殊地無異產民凋疎况復兵餘少畊鑿無字欲待重昭蘇
我歌折楊柳送君莫踟躕直度枕榔林落日吟鷓鴣他年考績應重到林
下相期話幽討紫藤無惜贈兩枝我欲看雲藉扶老

題廬山瀑布圖

廬山瀑布天下聞白河倒瀉千丈雲長風吼石吹不斷一洗浩劫消塵氛
我昔潯陽看五老探湫直上青龍嶼六月飛濤噴雨來洒作水花滿晴昊
是時謫仙邀我錦疊屏山瓢共酌誇中漚冷光直疑山骨裂清味不作蛟
涎腥爾來漫游身已倦端老芝岩寄淮甸枕流三峽杳莫期高寒每向圖
中見可憐問津之子徒紛紜高深誰得窮真源大千溟渤歛一滴汗滴絕
港焉足論我知山中有泉無若此便欲臨淵弄清泚是非不到烟蘿關兩
耳塵空何必洗

蜀府命題所藏宣和瑞鶴圖

宣和道君天帝子降靈下作長生主風流不混世間塵清山水壺湛秋宇
前身雅是太霄君金編玉策多奇勛感此仙禽四十翼朝真東度三山雲
低回不肯去舞雪依端門長鳴若有訴飛聲徹崑崙是時道君振衣起遙
聽鶴語通仙意濡毫爲寫青田真龍香更洒親題字朱頂凝丹砂白羽吹
霞袂內府珍藏誰敢沽大貝南金爛無比想當政和年善治談老莊遂令
霞上仙控鶴森朝翔一朝中原成永訣五國城高臥風雪此時老鶴如可
呼便欲騎之上天闕

蜀府命題所藏唐十八學士瀛洲圖

十八學士瀛洲仙文彩照世皆貂蟬廟堂論道豁胸臆作藩開闢神堯天
烈烈房與杜樹業光聯翩雅愛虞永興健筆鍊可穿褚公姚公才湧泉早
以儒術窮磨鑄二蘇二薛何挺特王門獻納相後先主簿倉曹亦英俊天
策從事尤魁然太學先生美雙壁參軍襟度冰雪妍宋州戶曹最清簡一
時風雅同高騫朝談黃石略暮校白雲篇所思在經濟末藝爲足傳方今
化雨清八埏西堂進講羅群賢搜材直欲盡岩穴拔擢遠邁貞觀前画師

殊有意模寫精丹鉛却令千載後名高日月懸丈夫宏達當如此誰能蠲
齷困一羶我願河清游後三聖人端拱開文淵還期比屋可封俗淳古不
獨圖像誇凌烟

題米南宮雲山圖

南宮米黻生殊方馳名画史妙莫當墨雲翻空太陰黑功奪造化開微茫
酒酣放筆情爛熳愛寫長林帶溪岸崑崙移得毫芒間數點浮雲落天半
鴨嘴灘頭沙浦通鯉魚浪颭苔花風山腰路險不可履飛瀑倒挂青天虹
我憶南遊邇湘沔七十二峰長對面赤壁山高看洞庭一道澄波瀉秋練
人生誰無丘壑懷可奈塵土羈長才子陵不遇劉文叔釣臺未必高雲臺
展圖頗識舊行處彷彿微鐘隔烟樹荒盡菱租老未歸寄書欲問沙頭鷺
秦淮謠送鄭太守歸光州石盤山

金陵古帝州山水天下壯大江九道通秦淮白頭浪蹴桃花漲一葦不可
航倒浸鐘山青虎石何崔嵬高壓長干城年年送人此離別官柳條青幾
回折冥鴻望斷三山烟重到憐君頭似雪呼酒鳳凰臺解君金荔枝人生
富貴豈不樂角巾歸里今奚爲北渡秦淮水西登石盤山黃鶴招欲來心

與雲俱閒草堂只在青松裏大兒將軍小兒喜斑斕舞彩春當筵斫鱸雕
盤奉雙鯉我歌秦淮謠送君長淮歸乞得閒身謝明主千金不換秋荷衣
莫笑囊無錢留取百篇詩他年太史傳循吏觀風載誦甘棠詞

遊遊方丈歌爲劉嗣庭賦

吾愛淮南王種桂小山裏日與八公徒虛遊閒道世劉郎淮南孫東書不
謁諸侯門東望蓬萊覓方丈扶搖欲駕天池鵬秀眉長身髮如漆驚座高
談頗奇逸浩然俊氣橫清秋窮途懶屈黃金膝弱水豈無路飛仙邈難期
蛟骨果有術富貴將焉爲男兒胸次隘八區託身何處山巖居但令忘世
卽嘉遊漫遊天地皆蘊廬朝揖洪崖君暮接浮丘伯挂劍扶桑枝種玉藍
田石時人不識烟霞蹤南征北走如旋蓬九市滾滾炎埃紅白雲半間誰
與同我有十笏地蒼蘆圍香風乃在天竺飛來之鷲峰斯當掃月渡雙澗
金沙別種金芙蓉燕坐獅子牀簾燈聽微鐘願洗玻璃酌甘露散花三繞
毘耶翁

漁樂圖爲茅指揮題

漁郎家住鸕鷀灣水雲千頃茆三間太平身不識官府只將網罟營朝餐

大兒扳罾露兩膊小兒鳴櫓垂雙鬟烟波託命作畝畝蒲葦不怕風雨寒
東泛白蘋渚西泊黃蘆灘水邊長見鷗鷺伴天上那識鵝鸞班得魚歸來
慰妻子收拾絲綸坐蓬底菱租剩有輸官錢沽酒街頭糴新米紫蟹黃金
螯白鯽丹砂尾錯襟羅盤餐交歡聚鄰里有身誰無衣食謀昨日紅顏今
白頭銅駝陌上車如流擾擾塵土何時休我愛嚴子陵脫身如老鶴釣雪
桐江臺高情付寥廓人生胡爲困羈縛對此新圖想丘壑扁舟弄月歌滄
浪誰似漁家有真樂

赤壁圖爲胡允中賦

江空水落寒無波倚天赤壁高嵯峨雪堂老蘇從二客携酒夜載扁舟過
中流扣舷發棹歌再起直遡空明三百里一聲孤鶴橫江來明月在天天在水
酒酣耳熱歌再起直遡空明三百里一聲孤鶴橫江來明月在天天在水
酌月呼嫦娥仰天聽天語洞簫吹徹廣寒秋却挾飛仙共高舉人生行樂
須及時昨日少壯今日衰功名自昔等炊黍英雄徒爲曹瞞悲画史獨何
心丹青託千載江雲山月想登臨彷彿圖中見風采後來遊賞豈乏賢文
章不如元祐前萬金詞賦爛星斗追逐騷雅光聯翩先生別去陵谷遷

漢宇宙迷荒烟臨早鶴夢骨可仙誰同此樂消閒年

題廬陵王子嘉古城讀書處

古城陰處饒古木古城城下烟水綠江上茆堂晝掩扉知是先生讀書屋
先生山澤列仙癯篋無黃金家有書燈火辛勤三十載添得秋霜生鬢絲
清晨起待簷光白尋讀陳編眼如月堅心自下董生帷兀坐忘營寧潮
平生學邁師古人不負堂堂八尺身多病豈堪金帶繫歸來獨釣碧溪春
富貴浮雲我何有不如相遇一杯酒古城山色年年青春風多種門前柳
雨後虛堂夜坐次方東軒參政韻

紫芝巖下寺淡泊偶同居身老計從拙心親迹任疎掃花風定後題竹雨
涼餘時得論清賞舞燈夜榻虛

奉和御賜詩韻三首

十年閒寄半龕雲覺義新除荷寵助華饌炊香天上賜好音傳喜日邊聞
尚書自進金縑製學士親題紫誥文白髮匡宗無補報不才深負聖明君
待漏從容謁九關日臨黃道覲龍顏鳳韶遠聽丹墀樂鸛片長聯玉笋班
間法有爲知世幻觀心無欲共雲閒榮恩不盡鴻恩祝南極天開萬歲山

滿袖爐烟吐紫宸。伽黎玉色賜來新。光翻貝葉諸天曉。香種曇花大地春。
禪月長明虛有象。劫風不動海無塵。見超生滅空三際。同證涅槃利主身。

主上於奉天門。賜坐焚香供茶午。就賜齋間。以宗門大意。首以靈
山付囑。繼以迦葉感化。爲對喜賦詩以獻。

蓬萊雲氣溼袈裟。奏對天門日未斜。僭部別分香積飯。龍圖親賜上方茶。
謾論魔佛生同劫。最喜華夷共一家。山野自慚無補報。散花琪樹讀楞伽。

登南嶽祝融峯二首

石柱盤盤紫蓋東。斗衡垂耀亘天中。水通巫峽三湘闊。地接炎荒五嶺雄。
別洞龍嵒雲盡黑。下方雞叫日先紅。一丘終老從吾願。何待黃金布梵宮。
鎮嶽高居紫翠間。上封樓殿壓崔嵬。風鳴虎錫神僧定。日射龍旂赤帝來。
四色蓮花從地湧。萬年松樹倚雲栽。虛游身在鴻濛外。一覽浮青遍九垓。

題衡嶽天柱峯

一柱通天鎮火維。層標拔起勢孤危。翠磨日月盤三楚。影落沅湘帶九疑。
羅漢時來乘白鹿。祝融晝下閃朱旗。神燈夜夜朝金刹。知有高僧禮六時。
白牛爲日本純上人賦

雲不住海門東牧向楞伽小朵峰露地已忘調伏力雪山誰識去來蹤
放歸祇樹隨羊鹿種就曇花伴象龍一色天關頭角別水晶池沼玉芙蓉

山謠

閒占雲霞作近隣芋田雖薄不嫌貧五風十雨清平世萬經千巖滯泊身
南嶽馬駒應有識西河獅子久無人金襴謾笑藏難足傳到龍華是幾塵

次韓都事秋懷韻

秋風吹裂菱荷衣南國書來白雁歸歲月無情今我老江山有恨昔人非
拚身易進竿頭步覆手難防局面機萬變不須論往事花前獨立看斜暉
次韻荅繆架閣兼柬陳元善都事

書劍東遊客四明風流從事最多情酒香邀共山公醉詩好吟如水部清
洗馬柳陰潮欲白呼鷹原上雨初晴龍門定有重來約掃月青松聽瀑聲
寄天寧楚石禪師

問訊秦川白髮僧風神清出玉壺冰舌翻霹靂談千偈心括虛空悟一乘
挿竹宰神朝禮座笑花弟子日傳燈玄功已勒浮圖石振策南遊擬共登

送榮首座還日本

揚帆八月挂長風直遡扶桑碧海東雪窟潮翻銀甕白天門日湧火車紅
蝦夷覓得迎沙島龍伯分齋候水宮應有國人來問訊散花園座聽談空

寄龍門琦元璞兼東白雲士瞻方丈

我昔巢松茂苑東白雲清實此心同巴蕉綠徧題春雨蒼荀香傳弄晚風
亂後溪山誰作主愁來江海總成翁相思欲借峯頭鶴騎向龍門問遠公

送日本希白上人禮祖塔之金華

天香吹滿屈朐衣幾度承宣到鳳池梵語傳來西竺戒華音吟得大唐詩
樹間遶佛長鳴錫洞裏逢仙不看棋無縫塔開瞻舍利干江月映碧琉璃

送西域丁鶴年兵後還武昌省親墓二首

寇亂移家去鄂城白頭重到影伶仃塢田歸東里新編甲墓指西人舊姓丁
樵牧不侵經世變松楸無祭泣山靈野棠花落啼鶯急酌椒漿老淚零
燕雲何處是并州赤壁磯頭問去舟海關山長羈旅夢天荒地老死生愁
他鄉寒食身千里故隴斜陽土一坏爲語東歸華表鶴英雄餘骨幾人收

送雲講師應召還吳門

老病蒙恩逐熱還寶泉頒賜起衰顏木杯度月百花外柵笠挂雪雙樹間

兜毘龍公齋鼓寂講餘獅子定鐘閑也知去住無心好渾似當時未出山
寄北禪佑講主洪武初應高僧召

雲霞剪作佛袈裟草座長年靜結跏趺罷六時天送供講來三藏雨添花
象龍曾赴高僧會羊鹿誰乘稚子車隨處溪山可終老不愁無地布金沙
送戶部徐主事謝官歸豐城二首

自斷千祿與時疎曉納牙牌別五除朝鼓罷陳新奏牘夜燈歸校舊藏書
青衆五畝連雲種黃獨千株帶雨鉏藉是身閒天所放不愁囊裡無儲
孺子湖頭水漲沙兵餘南望阻歸槎豪華自昔應多士文獻于今尚幾家
銀井蛟涎腥夜雨劒池龍氣溼朝霞煩君爲問檀陰寺誰布黃金掃土花

御賜圓通禪寺後以詩寄善世全室

龍河再鎮感皇情倡道從來屬老成睹史夜摩皆聽法震丹二國總知名
日邊華構開金利海上孤峯見赤城寶掌有符重應記虛空同寄祝升平
槎峰禪暇因諸夢觀右講經居武林口所寄佳什悵然有懷援筆
遂成長句時夢初寤中都龍興寺故錄以寄之

潛龍寺裏別經春幾憶清宵下榻頻風定長廊聞鐵盞月明深殿禮金輪

餐來香飯青精熟，賜出恩袍白氎新。近說鍊形如鶴瘦，多因吟苦語驚人。

耕隱爲南昌萬用中賦

山莊別築楚城西，百畝乘陰水一溪。莎草雨晴黃犢臥，稻花風暖白鳩啼。沽來官酒春新社，讀罷農書曉灌畦。孝悌力田新有詔，姓名還向御前題。

送錢子予新除博士致政還越中二首

除書新拜荷明君，祖別春筵采泮芹。餐玉未從仙老試，賜金應與故人分。渚船夜渡蛾江月，山屐晴經紫洞雲。龍節虎符勛烈舊，過家先讀表忠文。脩耳如雪面如丹，菱鬢蕭蕭脫小冠。湖近秣陵期卜宅，寺依靈徹話休官。霜红柿葉尊前寫，月白荷花鏡裏看。有約沃洲騎鶴去，臥雲不畏碧山寒。

題鍾山新寺三首

千載龍岡地有靈，布金重荷主恩榮。五雲樓殿開兜率，一統山河際太平。貝葉傳經獅子現，寶花圍座象王迎。天中雨露無時降，灑洗群生劫濁清。淮水東邊楚剎閒，常時花雨散經臺。夜龕明月千僧定，春殿香雲七佛來。般若深談中道秘，醍醐飽飲上方齋。皇仁普覆如天廣，欲頌無爲愧不才。道林大士昔談玄，海內今居第一禪。閒占白雲千畝地，近依紅日九重天。

賜田無役秋多粟汲井長清夏有泉劫石可消恩黃報家後願此豐年

題鍾山新寺後二日欽蒙聖製和章感遇之餘謹再用的賦三首

寶剎新成護百靈鍾山泉石有光榮金輪朝佛諸天喜玉帛來王萬國平
定起不知明月上身間只愛白雲迎龍飛幸際雍熙日親見黃河一度清
蓮花塔戶鏡容開設利流光月滿臺江吼羅浮東海去虬蟠龍勢北山東
雲中梵唄和仙樂天上香盂送佛齋盛世只今隆外護匡宗須藉仲靈才
聖主虛心論道玄宸章特賜起枯禪瑞浮雲彩來雙闕光映奎文動九天
蒲座開函風滿石花池洗鉢雨添泉經駝白馬今重到絕勝摩騰入漢年

次方明敏叅政東軒夜坐見懷韻

曾軒東望帝州城夜漏聲沉寂不驚八極天垂華蓋近三更月浸白河清
傳來玄史遺編在和到胡笳幾拍成淮擬長齋學蘇晉逃禪林下樂無生

次衛府危朝獻紀善見寄

若談東魯我談禪淮海相聞歡暮年劉向才名遺說苑楊雄詞賦重甘泉
收來柿葉朝頻寫吟到梅花夜不眠早晚定逢涼上寺三生舊話待重圓

過越王臺

人道耶溪好青山
罨畫開荷花三百里
無數白鷗來

次韻王敏文待制燕京雜詠十首

箕尾垂光地應靈
山來龍朔拱神京
淳風一代興王盛
眼見黃河兩度清
天駕灤陽銓暑回
鳳笙龍管內筵開
侍臣催進蒲萄酒
雲捧君王萬歲杯
暖風吹雨洒香埃
丹鳳樓高錦幄開
膜拜兩街花簇騎
金幢爭看刺麻來
曉宴皇姑拜上家
金錢滿賜紫駝車
黃門前導飛輦過
貂帽斜簪利市花
南風吹到運糧船
萬斛香粳倍上年
傳教漕臺添寒力
賜金多辦太平筵
錦貂公子躡龍媒
不怕金吾夜漏催
阿刺聲高檀板急
棕毛別殿宴春回
鳳池涼翠滴梧桐
白髮祠官侍內宮
見說御前催草詔
水精簾映玉屏風
鴨綠微生太液波
芙蓉楊柳受風多
日長供奉傳新譜
教舞天魔隊子歌
秋滿龍沙草已霜
射鵰風急朔雲長
內官連日無宣喚
佩取黃羊進尚方
契丹將老無依力
倦弓刀請受微薄祿
雲寒燒土炕
瓊裘拾得馬通蹄

次虞邵菴韻送閒上人

佛香浮霧畫雲廉
春澗鳴泉雪後添
乞食歸來雙樹底
散花如雨請楞嚴

寄神樂觀鄧仲修仙官六首

天上琳宮白玉梯，別開方丈五雲西。金花傳賜仙官詔，上有乾清仙墨題。
醺罷星辰校綠章，虛壇夜夜降祠光。白鸞騎得朝天去，手把芙蓉侍紫皇。
開徧溪頭巨勝花，雪精雙引紫雲車。忽傳青鳥催春宴，爛醉金桃阿母家。
紫翠房深敞石屏，神仙鍊液漱清泠。鍊符催起龍行雨，白日風雷走六丁。
自信身閒卽是仙，金丹何必問長年。修真獨許陶弘景，曾看裝符夜禪。
奉祠曾謁會稽山，湖曲天風振佩環。一色荷花三百里，洞簫吹月鏡中還。

好溪漁歌

少微山下萬松青，鍊笛携將過水亭。吟得竹枝新有譜，秋風吹與老龍聽。

題宋徽宗棠梨凍鵲圖

五國城頭落日低，故宮南望思淒迷。秋風愁殺棠梨樹，不及雙禽自在棲。

送金員外歸泉南二首

曾說西遊過月支，誰酣花市踏春歸。兜羅香帶齒微酸，猶是戎王不賜衣。
朱樓別起擁飛霞，浮石橋邊久住家。海日浴紅春雨霽，寒鵲啼嘶刺桐花。
車駕臨蔣山於崇禎寺，賜高僧齋議設無遮會。設成日號二首。

學峰寺前風日清，參輿遙近定鐘鳴。山林有道禪王化，天地無私荷聖情。

學約入梁終應詔惠琳居宋豈貪名金山重感千年夢願齊幽靈谷治平
祇園花雨曉吹香手綰袈裟近御床闕下紫雲隨雉尾座間紅日動龍光
金盤蘇合頒殊域玉盃醲醑出尚方稠疊屢承天上供每慙無德頌商唐

同朝天宮道士朝回口號二首

羽仙飛佩晚冷風禪子金襴映日紅共祝太平朝帝闕蓬萊遊五雲中
午陰初轉御橋灣齊退從容出九關天上好風重送喜繼輿明日幸鍾山

奉東周伯溫左丞二首

學士風流玉雪標早陪鳳輦聽仙韶光分蓮炬從天下香帶爐烟近日飄
書疑漢秦誇二篆史修南北見三朝承恩曾記東來日繡斧光華擁使輅
江淮烽火數州連分鎮東吳有歲年化雨早清蛟蜃氣文星夜動斗牛躔
貢來南粵終歸漢書入聊城遂破燕天下澄清今日望帛未許賦歸田

奉寄月彥明中丞

三月扁舟渡鑑湖棟花風急雨晴初共知出處心無愧自信經綸志未疎
海上雲霞明繡斧人間奎壁煥圖書中興近報王師捷徵詔行看下玉除
次芝軒中丞韻

執法南從越絕居繡衣光彩照坤輿黃金遺子無私察白髮匡君有諫書
遠捷已飛江上羽群凶眞作釜中魚歸朝定策中興業笑我山林與世疎
月彥明中丞者月魯不花也亦稱芝軒中丞至正乙巳以南臺中丞寓
居四明訪蒲菴于雙峯之定水寺故多倡和之什觀蒲菴與伯溫彥明
各寄詩江湖老病未嘗不乃心于元室也畧存之以見志焉

題趙彥微溪山小景圖

曾泥菴溪看晚霞紅簾小艇穩於車水通孤岸橋依竹路入重林屋傍花
風外眠鷗驚客笛雲中吠犬隔仙家秋波千頃芙蓉老誰覓王孫舊釣槎

送胡文善之官海南文昌縣二首

瓊州南去海冥冥婺女垂光應地靈洞入朱耶瀧水白山蟠紫母瘴烟青
郵炊每食枕榔麵蠻賦多輸翡翠翎定有遠人歌善治風謠紀德重銘銘
九域于今摠一家文昌誰道隔天涯石榴紅釀蠻江酒海漆香收瘴洞花
案上人耕春作市棠陰吏敢晚休衙蘇公應共題詩好僧耳泉頭駐小車

次韵趙子將提舉秋興

絕漠風高雨土沙五雲何處望京華南征尚阻勤王貢北汎頻勞奉使槎

蘇軾詩集卷一
三
蕭將戈船避敵海國人弓馬舊爲家洗兵會有承平日社稷安危不用嗟

寄東玉山處士

浮玉山前種紫芝松蘿雲月共幽期封侯不羨黃金印對客長歌白雪詞
柳浪平湖春放棹花陰圓座晝彈棋從游公子多才俊不寄新詩慰別離
避石湖蘭若二首

荷花蕩西湖水深上有蘭若當高岑客吟時見僧鳥下僧定不聞鐘磬音
雨香秋林槲子熟雲落空澗棠梨陰閒來掃石坐竹裏靜與山人論素心
五龍之峰雲作屏雙崖削出芙蓉青何人砌裏拾瑤草有客松間尋茯苓
林風不驚虎臥石山雨忽來龍聽經吳王臺榭今寂寞秋香薜荔花冥冥

寄洞庭葉隱君

一舸南歸髮欲華買山湖上臥烟霞寧知北海應多酒園擬東陵亦種瓜
丹壑泉春雲碓藥橋林風掃石牀花傳家自與隣翁異只說藏書有五車

西湖雜詩四首

芙蓉海口綠陰斜吹笛何人隔彩霞驚起沙頭雙翠羽銜魚飛上刺桐花
寶網金幢變劫灰瞿曇寺裏盡蒿萊鳥窠無樹山蘂泣不見談禪太傅來

流觴亭子鳳山阿都護行春小隊過笑擲金錢花底醉玉簪彈出自胡歌
荷鋤耕叟餉蒸梨家在官塘九曲西白髮強談兵後事眼枯無淚向人啼

掩關

摘木形骸百念灰溪猿野鶴苦相猜開門獨掩青松雨笑口逢人亦懶開
題陽關送別圖

三月皇州送珮珂柳花吹雪滿官河縱令渭水深千尺不似陽關別淚多

題黃荃蘆雁圖

稻滿秋田水滿汀黃蘆風急度寒聲太平江海無緇穢不用呼奴夜打更

題趙松雪馬圖

振鳳長鳴產月支玉關風急貢來時五花獅子真龍種賜出黃門不敢騎

題夏珪風雨行舟圖

君遊南越我西秦盡日江頭採白蘋無限波濤起平陸順風休笑逆帆人

趙仲穆春山曉思圖

樹色蒼涼曉欲迷石門初入鷓鴣啼桃花不隔秦人路流出紅雲水漲溪

雲峯住公

法住豫章人號幻菴又號雲峯得法於蒲菴復公

次韻答劉克勤

老寒軒冕不須期還慕林泉歲月遲雙眼長青惟愛客滿頭都白苦緣詩
尚傳天祿書千卷猶對青藜杖一枝無事閒來依佛日白雲深處啟禪扉

次韻答王祖年

南山得話歲寒期道合寧論會面遲元亮休官能入社少陵問法悟觀詩
茶烹石鼎新敲火衣挂雲松舊偃枝自是一閒天所放日高尚閉竹間扉

送徑山隆上主回吳中

海內車書喜混同飛雲流水逐行蹤秋風偏乞王城住夜月長聽官寺鐘
物外閒情憐淡泊燈前軟語話從容明朝棹指吳天杳矯首東南送斷鴻

姚少師獨菴衍公

少師釋名道衍字斯道族姓姚氏長洲之相城里人幼名天僖本醫家子
顧不肯學醫魁磊高岸意度偉然喜爲儒者博貫該通之學至正間削髮
居相城之妙智菴里中靈應觀道士席應真者讀釋學道通兵家言尤深
於機事公師事之盡得其學然深自退藏人無知者惟王行止仲獨深知

之公應運山書記之召止仲爲文贈之以謂上人年甫壯天下亂已極且必該治治然後出於時以發其所蘊非以沙門之法終其身者嘗寓嵩山寺袁珙見其相而異之曰公非常僧劉秉忠之儔也洪武初再以高僧徵十五年十王之國太祖命各選一高僧侍王公在燕府籍中住持慶壽寺靖難兵起妙識幾先贊助秘容太宗卽大位召至京師欲官之固辭爲僧錄左善世立東宮特投資善大夫太子少師復姚姓賜名廣孝輔太子南京監修高皇帝實錄上命蓄髮再三終不肯賜兩宮人不近亦不辭踰月乃召還嘗以遺書歸吳徒步閭里以賜金散之宗黨永樂六年來朝北京仍居慶壽寺病篤車駕臨視問後事對曰出家人復何所戀明日詔諸門人告以去期似袂端坐而逝夏八十有四追封榮國公諡恭靖茶毘之日心舌與牙齒固不壞得諡利皆五色賜塋在房山縣東北四十里上自製文銘其碑仁宗立加贈少師配享太廟嘉靖中移祀大興隆壽寺公初侍燕邸每夜夢與劉太保仲晦寤語厥後現身佐命恪守僧律南屏西山後先觀化兩公之賜名一曰秉忠一曰廣孝豈非宿乘願輪再世示現者與余錄公詩列諸釋氏以從公之志所以崇公者至矣公居吳爲高啓北郭

十友之一啟嘗叙其獨菴集以爲險易並陳濃淡迭顯能兼採衆家不事拘狹化後吳人總刻其詩文曰逃虛子集

石經山

石經山在燕之范陽郡峰巒秀拔若天竺山故稱曰小西天隋大業間有法師靜琬者處是山思聖教有難不能流通於是發願募緣敦工鑿石爲板刊造一大藏經儲積于山以備其後法師首刊至唐貞觀初僅成大涅槃一部而法師乃卒其後子孫繩繩化億萬人乞錢粟刊造餘部歷遼與金然後完此一大藏貯于巖洞者七地穴者二洞以石門閉之穴以浮屠鎮之自隋唐遼金及元碑碣森列照映巖野然而累經千戈無秋毫之犯洪武二十一年歲在戊辰春正月廿一日余奉 旨往觀念法師之願力宏大堅固是山之泉石靈異清勝故賦是詩鐫于華嚴堂之壁雖未足彰法師之幽光庶以紀茲行之歲月而託其不朽也詩曰

峩峩石經山蓮峰吐金碧秀氣鍾太題勝概擬西城竺墳五千卷華言百師譯琬公恩變滅鏤筆蒼蒼石片片青瑤光字字大古色功非一代就用藉萬人力流傳鄙簡編堅固陋板刻深由地穴藏高從巖洞積初疑神鬼

工廼著造化迹延洪勝汲塚防虞猶孔壁不畏野火燎詎愁蘚苔蝕茲山
既無盡是法寧有極如何大業間得此至人出幽明獲爾利乾坤配其德
大哉弘法心吾徒可爲則

送友人之松江得曙字

潮來沙磧平月落海門曙汀蒲轉風葉堤柳搖烟絮江頭春可憐天涯人
獨去有歌送君行無酒留君住雪浪沒沙鷗雲帆出江樹回首讀書堆青
山不知處

宿福智精舍懷南隣張羽來儀

我客悵無依君居欣在邇清談夕散歸獨臥松軒裏露香檻前桂月色池
上水懷爾正沉沉不知暮鍾起

蠡口夜歸

日沒渡口昏水風著人熱漁燈帶螢火微光互明滅舟人報水程路遠行
欲歇故山不分明日盡心力絕遙想山中人待人仍待月

茶軒爲陳惟寅賦

千苞凜冰雪一樹當窓几晴旭曉微烘遊蜂掠芳蕊澹香勾蜜露繁艷照

煙水幽人賞詠遲每恨殘紅委

訪震師不遇

波澄一谿雲霜紅半山樹荒煙滿空林疎鐘在何處不遇采樵人復抱孤琴去

和徐一夔遊龍山雜賦二首

脩脩一禪宮樓臺隱金碧松關掩咽音花龕鎖雲迹群僧禮祖餘香燈自長夕

出巖不逢山長江波淼淼落日下遙汀寒雲翳沙鳥延佇目難窮孤帆來樹杪

初春晚坐南軒喜王山人過訪

春陽勢未舒林深暮還冷開軒悵久坐獨對青松影石龕沍閑雲苔井響寒綆驚客鳥翻翻照佛燈耿耿華輶辱遠過襍遯破幽靜臨風咲語溫道念心已領諒惟高世士元非翫光景遙送出林扉新月懸西嶺

晚步

晚步出門去林端見新月牛羊下嶺來疎鐘何處歇行行且復伴遙對面

山雪

白蜺江阻風夜宿江口兼懷徐貢

顛風江渡難停櫓，依茭葑濤烟翳暝光灘。
月侵寒夢漁婦候，火明鳧眠忌蘆動。遇險更思君，陡覺離愁重。

題友鶴軒圖

幽人適埜意，崇軒起山隈。涼風響澗木，晴霞明砌苔。
荆扉夕不掩，多應放鶴來。

琴臺

崇臺起雲岑，夫差日遊宴。七絃石上彈，閑花落餘片。
風清松苔響，烟茸草成薦。至今想餘音，泠泠散秋院。

百花洲

水滌接橫塘，華多礙舟路。波紅晴漾霞，沙白寒棲鷺。
綠汀漁網集，隔渚菱歌度。不見昔游人，風烟自朝暮。

上方

蓮宮據山椒，岩堯去天咫。風香花雨新，僧行白雲裏。
幽沉樹樂靜，蕭散烟

鐘起人登石路迷依依緣澗水

許溪

青山兩岸分夕渡舟橫口夏雨欲生蓮秋風先到柳聲殘煙寺鐘香餘茆店酒相見無別人唯逢耕釣叟

師林精舍遇盈師夜坐

空林長掩關閑雲去無迹偶來值禪侶清談忘永夕坐久磬聲沉松堂一燈寂

雞鳴歌

金壺漏殘霜滿屋雞鳴喈喈鳥尚宿征夫才起促行裝馬爲駕鞍車整轂雞罷俄聞鼓角悲別婦出門雙泪垂婦牽夫袂話歸日願學雞鳴不失時

車遙遙

車遙遙行人心忙疑路迢黃塵眯目神更亂紅雨點衣袂欲消車聲似與啼聲續羊腸難比愁腸曲沙頭酒家不少留匆匆碾破平蕪綠妾身願同楊葉輕春風千里隨車行

栖鳥曲

啞啞鳥結巢庭樹枝去年庭樹官盡伐主人不忍鳥巢移城上月明金柝罷臨風遙望鳥來歸鳥不歸主應惱非是與鳥情義少願汝結果田野間莫戀他家樹枝好

題觀音巖

高閣凌虛如履地長江萬里來無際世人可到不可留只許禪僧深夏住亂帆來往逐雲飛隔岸淮山擁翠微大士巖間常安坐一燈夜照客船歸采適爲余唐卿賦

余君抱奇言不誇種菜擬學元修家臨溪築廬競誅草傍路焚圃多編葭長纔短纔自成列不與文筆相交加畦畧條條任衡縮溝澮一一隨紆斜種多不減三十品分苗撒子時無差溉灌未能親抱甕設計巧欲爲翻車一畦旣傳渤海莊五色更接東陵瓜新菰脆美初斫脍嫩瓠肥白纔煑爬馬齒忽驚齊發莧牛乳始識駢垂茄芳心纏絲惡網蛛老葉盡籜析涎螞自能墜土不難穢便可應候登柔茄長奴艾炙脚自赤老婢採擷頭還壓不令筐筥混葵藿反任鼎俎兼魚蝦蔬羹自適頗蒙適薺薑可辦何咄嗟誰云小摘畏傷指我欲大嚼嘗搖牙何時携杖叩君室且需木耳并槐芽

荷能真率見情親
奚啻酒薄兼尊汗
一餐自足飽空腹
豈特鹽桂烹雞駕
丈夫不能知此味
五鼎日食成淫奢
若今措事慕諸葛
憂等隨處爲生涯

山行

山前雨晴山後陰
槿籬花繁羅逕深
燒煙無數人家少
樵子兩三來遠村
斷橋流水不可度
落日孤援空候吟

晚過獅子林

無地堪逃俗
乘昏復到林
牛山雲過磬
深竹雨留禽
觀水通禪意
聞香去染心
叩門驚有客
想亦爲幽尋

重經常熟縣

鉅邑當吳北
官無接送勞
水多崑海近
城半在山
高僧寺餘庭
柏人家盡野蒿
重遊逢日暮
惆悵促回舸

題張山人適樂園林館二首

開牖依林樾
迢迢去市邇
翠低承雨竹
綠碎受風蕉
夕巖遺侵戶
春流欲斷橋
主人緣愛客
時爲出山瓢
一軒開小圃
近水更悠然
杏棟繁花霧
芸窓宿篆烟
竹藏鳩子哺
苔襯鶴

雖眠此地多風景幽深似輞川

秋日重遊穹窿山海雲精舍二首

迢遞青村外崎嶇紫邏間
過林才見日到渡不逢山
一室依巖陰雙扉傍竹閑
曾看雲際鶴向暮獨飛還
地遠塵難到人家半隔溪
放禪還候磬起曉却憑雞
雲度隨山窮泉行赴澗
低披藁薜薜壁更爲刻新題

日暮沙上口號

寂寂村深路人家盡掩扉
平沙縈鳥篆疎柯絡雲衣
無興從南去多情向北歸
老年行履倦宿不待斜暉

題画

小小板橋斜路深深茆屋人家
竹塢夕陰多雨桃源春暖多花

張山人適見訪暮歸口號

隔水茆堂塵靜臨溪松戶時開
煙碧澗邊非草雲白山前是梅
葉爲知音一曲酒緣得意多杯
今日乘驂且去明朝帶鶴重來

春日西溪卽事二首

雲斷山峰遠遠樹迴溪路斜斜酒旗風颭村店牛衣日曬田家喚婦鳩藏
密竹引雛鵝聚圓沙人晚權歌歸去爭先去折汀花
人家半依沙嘴舟子長停岸足楊柳三株五株桃花一簇兩簇斜陽澹澹
牽黃遠水盈盈張綠老翁忘却投綸因看晴鷗對浴

龍宮

琳宮虎爽接微垣玉樹陰森隔市喧日轉松壇人影寂春回花殿鳥聲繁
偃乘風去開園室雲帶龍歸鎖洞門福地年來猶落寞人間消息底須論
京口覽古

譙樓年來戰血乾烟花猶自半凋殘五州山近朝雲亂萬歲樓空夜月寒
江水無潮通錢甕野田有路到金壇蕭梁事業今何在北固青青客倦看
喜陳冕廣東回京

詩滿行囊興未窮來時還與去時同鷗波窈窕孤雲外馬路迢迢夕景中
衣潤尚含榕葉雨帶香曾著荔枝風那知此日龍河會却話聽猿過峽東
寄虎丘蟾書記

聞道蟾公似贊公一瓶一鉢寄山中雲封蘿屋長疑雨泉響松巖半是風

履破只緣行脚久囊空并爲作詩窮
遥思短簿祠前夜共聽寒鐘出磬東

題平坡寺

平坡杳杳挹西湖徑斷樵行敗葉鋪
泉落石河深愈急雲歸沙樹遠疑無
夜堂風靜紆帷幔曉井霜寒響轆轤
那得餘生辭世網捲衣來此日跏趺

春暮與行書記過師子林

偶同看竹過林廬素抱忻從此日舒
淺碧雲虛泉落後孤紅霞澹澗芳餘
放禪時至鐘鳴室施食人回鳥下除
勝地每嫌山水隔不因乘興到應踈
全室禪師使西天竺取經回朝奉和

竺乾山里歸來日庭下松枝已向東
皓皓厖眉踰雪白翩翩毳衲帶雲紅
墨花瑞現傳天界貝葉文翻進帝宮
千手大悲增意氣護龍河上舞春風

聞雁

鳴雁初離群餘哀度水雲那知故鄉夜亦似客中聞

山中見王旼

身外留黃犢山中畀白雲不隨樵子去無路得尋君

送昂上人遊洞庭諸山

西風飛錫度如舟來向湖山作勝遊七十二峰青一色君看何處獨宜秋

題薛澹園墨竹

澹澹烟中映夕曛疎疎石上拂晴雲展圖却憶西岡夜坐聽秋聲亦有君

題倪雲林墨竹

開元寺裏長同宿笠澤湖邊每共過誰說江南君去後更無人聽竹枝歌

題幻住山居圖

萬疊青山萬疊雲亂泉流處路微分巔猿悽斷人愁聽只隔煙蘿便不聞

秋蝶

粉態凋殘抱恨長此心應是怯淒涼如何不管身憔悴猶戀黃花雨後香

與咲軒晚過潁山精舍

偶同禪友到林中竹院深深小逕通斜日在山人散後亂蟬疎柳自秋風

宿幻住草菴

二首

草菴寂寂住城西寒夜重來樂舊栖譙鼓無聲更漏永滿林殘月聽烏啼

一燈長夜佛前明庭樹枝多宿鳥爭野外霜寒人未起林僧肅肅又經行

登金山寺寄甘露湛源長老

三度來登多景樓妙高臺上始能遊
長江如練山如畫獨倚闌干咲白頭
徐國看花已落

自咲尋花獨後期殘紅粘砌綠繁枝尋常日對酒多恨況是斜風暮雨時
轉應詞二首

新柳新柳掩映溪頭渡口長條未絆遊人正是江南早
春早風雨獨行古道

斜日斜日門外馬蹄聲疾林栖鳥盡飛還霞彩紅銜遠山山遠山遠莫怪
行人歸晚

獨菴老人白題像贊

在京師崇國寺

看破芭蕉拄杖子等閒撇骨露風流有時自把龜毛拂只得虛空笑點頭
南洲法師洽公

溥洽字南洲山陰人族姓陸氏放翁之後人也於邵之符濟寺禮雪庭祥
公爲師從具菴玘公於普福貫串經範旁通儒典禪定之餘肆力詞章洪
武二十二年召爲僧錄司右講經三年代夢觀主天禧又三年由左闡教
陞左善世太宗卽位召斯道行公于北京命主教事公以左善世遜衍

而已居右 永樂四年詔修天禧寺浮圖車駕臨幸命公慶讚神光燁煜
天顏說禪時有任覺義者忌其寵構詞問之左遷右覺義公不辯自處裕
如既而上察其心復右善世 仁宗卽位數被召問乞居南京報恩寺養
老遣中官護送宣德元年七月示寂留偈而化年八十有二塔于長干西
南之鳳嶺上遣行人王麟在祭賜院額爲鳳嶺講寺此楊文貞公士奇所
撰塔銘之大畧也海鹽鄭曉今言云靖難兵起溥洽爲 建文君設藥師
燈懺詛 長陵金川門開又爲 建文君薙髮 長陵聞其事囚之十餘
年永樂十六年姚榮靖疾革車駕臨視問所欲言榮國於榻上扣首曰溥
洽繫獄久矣上卽日釋之出獄走大興隆寺拜榮國床下白髮長數寸覆額
矣楊文貞塏銘又云三四十一年間鉅細老納有文聲者師與衍公爲首衍
公旣進位宮師晚年於師尤厚將化之前一日 太宗皇帝親臨視之問
所欲言獨舉師爲對不及其他文貞於洽公繫獄及設懺削髮之疑皆沒
而不書但云遭讒左遷又云衍公將化獨舉師爲對則又槩槩其事使讀
者習而問之此所謂不沒其實史臣記事之體也正統三年廬陵周文襄
公忱譔鳳嶺講寺記云公當永樂間嘗爲同列所間 太宗皇帝欲試其

戒行幽之於禁衛者十有餘載其記治公下獄與文貞塏銘互相證明其事益有徵矣壬午遜國之事國史實錄削而不書無可考據觀洽公十載下獄考其所以被讒之故則金川夜遁之跡於是乎益彰明較者無可疑矣文貞文襄身事長陵服官史館其所記載非裨官野史可比鄭氏記遜國事多流聞失真此其最爲可信者詳稽洽公之行履用以參補太孫之本紀不當以爲浮屠一人之始終畧而置之也洽公繫獄野門徒星散獨心田霍公不肯一日去左右洽公化後建塏創寺刻其詩爲雨軒集八卷霍亦官右覺義云

次韻香爐峰爲恩上人賦

昨夜夢還鄉青山苦磴曲綠雲陟香爐蘿衣濺寒瀑落日叫徃颺遙天飛屬玉前峰半臨湖老驥渴奔谷後崦互聯群龍爭拱伏敷敷風外花蕊飄飄中木濟險覺傷神驅遐况清目咫尺接三山溟波纔一掬仙人隔微茫下士空踟躕石洞闊陰崖琳宮亘華屋禹穴不可探金書藏臍腹流傳失其真遺音竟誰續岩阿得禪樞見客喜能肅名緇嗜烟霞肺腑在林麓雨臥杖生鱗烟吹鐺折足清鍾咽朝霜忽覺恨鳴速驚起因欲明寤言黍

方熟偶披群公詩如叶大人卜咏之書忘疲字字恒三復搜枯和斯章祇
悅十年讀

山澤居爲徐端蒙賦

達士不徇俗翛然列仙癯樂天得其趣且作山澤居牽蘿北幹下石田繞
吾廬渠流引溪淥既耕亦可漁芳辰視庭戶嘉木春已敷兒童議所務爭
把種樹書新醅潑甕盎鄰叟時一呼酣歌擊瓦缶夕陽在桑榆

送貫草堂之武林千佛講寺

道公法中龍高風凜僧史當年舊招提頽落紅塵裏千佛久沉輝數間猶
共峙寒燈耿紗籠雨蘚饒華肥傳之豈無人往者竟誰似茲焉得良才扶
植將有以錢塘十萬家青楓接城市善導應徃諧講花喜新委嘗聞神霄
遊子夜何足齒妖術苟內訂正塗嗟壅底鼉鼉浮汴宮龍馬渡江水道州
復生還拙遲亦聊爾青松入湖濱焦葉散荆杞烟朝見漁樵月夕來鹿豕
吾儕遭盛明恩渥愧無比乞身儻東歸幽尋從此始

陪獨菴禪師清真第茶讌分韻得香字

冬暄無雨雪始雪廼凝祥感時重文會延賞開華堂玉盤出笋蕨金盃流

蔗漿精羞駭羅列白戰憐清狂眷言歲已暮不樂徒自傷出門復投轄垂
簾更焚香

遊南翔寺追和葛天民韻

白鶴南翔何日返香雲不斷春風轉屋爲鱗次枕江安江作蛇行到門遠
的的明燈金殿寒沉沉複道長廊晚老翁矍鑠皓鬚眉愛客將迎咲盈面
自言天監拓基來食指數千猶共飯斷碑壁下試摩挲迴趺剝落埋荒藓
茫茫往事比寒潮蒼烟落日愁難遣就中何處愜深遊玉甃清池開別院
二外已去老堪徂此二齊者梁得齊諸行齊興建故壘空來舊栖燕吾宗有
弟知此懷炊黍功名豈榮願便呼阿買寫新詩硯池澀擁清水片

送高幘首還越

昔我來吳今五年青山目斷東南天越音未改吳音熟每見鄉僧一惘然
上人何來亦瀟酒纔打鄉談便能解觀光上國及期還聽講長于前月罷
楚公此地迹猶存爲我重開幘悔門石橋花飛香杳藹蓮池蛙靜雨黃昏
夢中金鼓聲初歇却艤扁舟欲歸越碧草遙憐茂苑春蒼苔不掃峨眉雪
竹間舊房蘿薜侵篋書芸消生白蟬人情懷土無古今怛怛終爲莊舄吟

我亦因之思禹穴負簷未息愁難任陸沉鄉井亦何事白鷗有盟宜重尋
清鏡閣前湖水深曾爲先人照苦心丈夫出處自努力贈言愧比雙南金

題王冕梅花揭篷圖

王郎寫梅如寫神天機到手驚絕倫自言臨池得家法開縑散作江南春
酒酣豪叫呼霜魄寶泓倒飲胸襟薰龍跳虎臥意捷出縱橫錯漠迷芳塵
繁花不消千樹雪古苔蝕盡樛枝鐵縞衣綽約珮璫明夜夜貞心照寒月
嗟予落魄西湖濱夢魂幾度入梨雲東風吹香趁流水斷橋愁送波云云
一杯不到孤山土忽見王郎已千古還君此圖歌莫哀原草青青隔煙雨

應詔於龍灣放水燈因賦

持節馮夷向久過遠分燈火出官河斗牛光動天垂野風露聲沉水息波
海族樓臺休罷市鮫人機杼不停梭九泉無復悲長夜莫問南山白石歌

送金上人古上人制滿同還南翔

涼入西霞木落初送人長是歎離居江山故壘三更夢風雨寒燈一卷書
變化不同難伏鵠聰明已辯魯爲魚還山爲問南翔鶴秋影何時下碧虛
次韻寄荅一初因懷南竺具菴老人

白咲還鄉野性慵有懷多爲白頭翁山樓半照崦嵫日海郭孤吟舶趁風
賀監祗應歸鏡曲征西也復念譙東淒涼莫話平生事容易魂消蒼莽中
雷峯一初送竹嶼春谷和尚詩有莫念平生下澤車之句就爲起
句以寄之

莫念平生下澤車新詩傳得自西湖飛搶不羨培風翼秣飾徒憐病賴駒
野殿劫灰前古寺離宮春草舊行都相望惟有南峯月照見黃妃塢影孤
遊吉祥寺

伏龍岡下舊招提猶記兒時到竹西白日幾何人易老青山咫尺路都迷
高林霜木雲邊見小閣冰花雪後題最愛多才賢父子薜蘿深處與扶藜
野人居爲吳中行作

桑田穉綠麥生岐男女新年解縷絲老至已憐同甲少業成未覺見丁遲
槿籬日薄雞豚散花鳴春深蕪雀知却怪閒情消不盡據牀長咏竹枝詞
送謙選中住花湮寺

秋風一櫂入花湮楊柳芙蓉接水亭野老尚能談故事鄉僧爭請說新經
嫩梧雨外聞啼鳥樓閣烟中見溼螢欲寫別離無限意孤鴻遙沒越山青

贈鞋生

父子相傳履製奇，青絲細軟合時宜。
聲隨鳴珮君王識，影落飛鳧太史知。
泥滓乍離歸隱計，香雲纔振上昇期。
年來弊屣無心棄，却笑干將補較遲。

金園草堂

草堂簷拂水，雲低花木叢。
叢繞琅溪捲幔，躍魚搖倒影。
攤書巢燕落晴泥，藥苗教子春前種。
蕉葉逢僧雨後題，幾度画船移晚棹。
旁人錯比瀟東西，魯王登長干塔。

涼秋飛蓋過長干，寶塢登臨霄漢端。
天近彩雲連紫極，日高紅霧擁雕欄。
颶蒙氣接三山遠，淮泗光分二水寒。
清興未闌聞鼓吹，香風城闕謾回鑾。

送彙木菴歸姑蘇

幾年漫浪闖閭城，與子追遊杖屨輕。
烟草鹿臺尋古迹，水雲鷗渚結閒盟。
江山已入章郎句，齒髮徒傷白傅情。
相送長洲天際路，畫船茶竈憶春行。

湯時仲小林居

昔年曾過小林居，門下蕭蕭古木疎。
床雨獨看先世笏，帳烟還讀外家書。
杏花紅褪春猶在，菜甲青稀曉自鉏。
回首長洲多茂草，幾時清嘯落樵漁。

送會天元住紹興能仁寺

許詢故宅祇園寺童穉嬉遊不記年樓閣參差霄漢上山川迢遞斗牛邊
縈池晝引芙蓉水負郭秋登罷耜田今日送君迷舊迹都門回首一悽然
次韻王起東夜宿琵琶洲

倚棹寒江照白頭看山不盡且遲留無人爲寫琵琶恨自撥鶻絃過小洲
蘭江楚公

清澹字蘭江天台人嘗說法吳中緇素傾向四座至無所容後居天界寺
高皇帝召對稱旨御製清澹說賜之有應制次鍾山寺作晚憩錫邑之
東禪寺有望雲集及語錄毘盧正印行世學士宋濂爲叙

謾興

困來高枕臥崑崙覺後凌風到海門信手攬回推日轂轉身挨倒洗頭盆
山川也作紅塵化富貴徒留青塚存好在黃眉脫牙叟且同花下醉芳尊
寄聰聞復

豺虎縱橫千百里陰陽錯亂十三年何時草木能同化咫尺山河不共天
夸父但追紅日走陳搏偏占白雲眠公須力展扶危策老我無成雪滿顛

悼李公奇

一首

自從繡帽離京國平克山東又海東
決策但期千里勝回頭俄見一星紅
雲橫古汴神兵寂月滿長淮虎帳空
最憶張巡齒牙落唐家青史有奇功
應是悼李忠襄之作不知何以云李公奇也

萬里關山雙虎節十年寒暑一綸巾
憂民憂國又憂主盡孝盡忠還盡身
厚地血凝爲琥珀高天魂聚作星辰
功成但在凌烟閣如此兩全能幾人
寄仙岩翁

巾峰高插牛斗旁高人一出草木黃
碧雲縹緲下溟漳直來竺國吳山陽
吳山竺國山水重丹竈烟鎖蓮花峰
一聲兩聲猿嘯月十里五里松號風
高人放浪得真趣半紙功名何足貴
白頭黃卷對青岑金鳥飛上婆羅樹
登鍾山唯秀亭

浥袂秀色時蒼蒼馮陵八荒隘九陽
裂地長江走脚下巡簷赫日當吾旁
楚天吳天雲海寬千山萬山蛟龍蟠
采石沙頭人喚渡大茅峰頂仙騎鶴
眼底山川不盡識蘇花石路空輦迹
憶昔玄島看波時六氣不動乾坤寂
牛圖

春光寂寂烟暈晴春風水水波浪明溪南溪北小坡平我卻騎牛向溪曲
溪曲煙草嫩如玉記得當時農事足倒指數來三十年今觀此圖猶宛然
只多舐犢雙崖邊

遊洞庭

我有山水癖周遊訪遺迹春宵宮畔住多時對面翠峯參天直偶乘飛雲
到上頭上頭佛屋依雲陬庭前老樹作僧立井中神物爲人遊湖吞八極
天倒開赤烏半溼東飛來櫓聲驚裂馮夷窟沙渚照破銀濤堆扶桑枝枝
手可掇龍伯釣頭鰲欲脫影壓錢塘天日低雲盡崑崙月支闕身栖在仙
鄉仙鄉時節長仙人共語紫霞裏霜橘顚黃金香青鞋布襪真快意玉
馬金鞍又何貴回首人間一窖塵明朝弄月羅浮去

懷故人待一翁

吳中夜半北風惡自起開窓望天角東湖西湖作銀流大星小星如雨落
道不同兮不爲謀寥寥天地誰同儔彼美人兮在何處霜月冷浸青海頭
小吳軒

層軒拔地臨四極虛窗去天不盈尺坐久紗帽觸雄風身在璣衡少微側

昆丘兔入雲陰寒賜谷鳥升海水赤均堂一勺茫
英雄霸業夫如何腐骨鈴蜉掩窰安仙翁笑指白藤花拂拂清香滿瑶席

登車行

擊書使者來海涯躡曉迫趣登輪車高岡礪斷赤石骨長空拂碎紅雲花
大聲坎坎打天鼓小聲嗚嗚煎春茶義生馭日信可並阿香撒雨何足誇
直入九重紫金殿玉皇對坐傾流霞霓裳羽衣萬變態龍笙鳳管相喧嘩
從容握手問至道掀髯一笑吾還家

多景樓

偶來古潤峰頭行峰頭傑閣凌空橫壓幘圖天若箇笠循簷萬國如輕萍
分昏割曉泰華聳衝淮突漢黃河清浮玉仙壇銅氣赤紫金佛域龍珠明
歸墟宏洩碧海立大江直下銀潢傾楊子渡頭帆脚正瞿塘峽口雷霆鳴
玄巖長鯨舞北極朱翎健鳥翔南溟龜臺霜寒月皎皎桃都露溼花冥冥
恨石曾知已化土甕城始信空留名英雄紛紛何足數天語察察當心銘
張騫乘槎實可意豎亥按步徒勞形伸手便堪扶日轂脫塵底用登蓬瀛
六氣入口凡骨換回眸一笑清風生

思鄉

生涯霜鬢裏舊宅閭溪旁
瑤草爲誰綠梓邪應自香
大車聲檻檻君子志
陽陽何日騎魚去携孫看海棠

靈岩集涵空閣分題予得靈岩山時至正壬寅臘月十八日也

驚峯攬斗牛飛車登上頭
左拂扶桑樹右揖崑崙丘
太湖蕩四極白波如
銀流向時泊吳輦汎汎揚蘭舟
回首日在地一笑雲悠悠

吞碧樓

在日本九州

九州城曲樓三層披襟御氣歡
吾登窗開曉色拂桑樹簾捲夜光橫
玉繩上頭端堪謁紫府
下面更可窺玄廷
天帝垂衣日杲杲
海龍穩臥雲冥冥
方壺三神指顧裏
渤澥百谷琉璃明
極身飲露老亦足
理亂黜陟無關情
時聽玉管鸞鳳鳴

夜坐

寂寂虛堂獨坐時
小窗推起更思惟
江城萬井烟花白
月到松頭鶴未知

西湖曉行

海角曛曛日欲生
山南山北淡烟橫
春風吹斷沙禽夢
人在綠楊堤上行

過許村

小徑無媒生土花一橋一水一人家
隔離話道今年好婆子引孫來看麻
九日

頭白眼昏無住著大都客裏過重陽
人生便滿一百歲消得黃花幾度香
淵明采菊圖

泛觴黃菊終非觴在眼青山殊有情
好是晉家天地闊此時何處著先生
懶菴禪師俊公

廷俊字用章饒之樂平人甫此出家年二十
薙髮謁新笑隱于中天竺訢公歎曰子
黃龍佛印流也訢住持龍翔集慶延居第一座歷陞吳越大利
至正末主錢塘之淨慈內附後浙西僧道以事役集金陵師在行館于龍
河明年建元洪武徙寓鍾山端坐示寂闍維舍利無算歸塔南屏山中葬
日天花如雨危素著塔銘稱其爲學善記覽於前人出處言行雖千百年
若指掌尤詳宋事宿儒俱服其博洽有泊川文集五卷五會語錄黃潛杜
本李孝光張翥周伯琦皆爲叙

石頭城六王待御韻

袞袞長江去不休巖巖盤石踞城頭千峰日落淮南暝萬樹風高白下秋
流水尚遺諸葛恨東風不與阿瞞留中原一髮青山外萬古終爲王謝羞
翠微亭

誰構遺亭莽蒼中蕭蕭深谷起悲風五更璧月初沉海萬里銀河欲瀉空
江關淮南連画鷁雲開塞北見飛鴻黍離不獨周人恨滿目寒烟六代宮
有渡

有渡方舟小無家道路長大荒天渺渺滄海日茫茫水母浮還沒風鴛出
復藏不須寒雁叫客意已淒涼

未歸

越山無盡江湖客未歸北風吹雪冷南雁貼雲飛斷路迷行跡驚湍激
衲衣本來無住著何事却依依

題画蘭

綠葉微風際清香小雨餘湘江春水闊愁殺楚三閭

竹菴禪師渭公

懷渭字清遠晚號竹菴南昌魏氏子廣智全悟訢師俗姓之甥而法門之

嗣子也全悟住持龍翽清遠居座下得從名薦紳張起巖張翥危素遊其學大進全悟示寂囑之曰能弘大慧之道使不墜者唯爾與宗泐爾歷主湖東西大利洪武初一奉詔至鍾山退居錢塘之梁渚爲全悟藏爪髮之地洪武八年順世世壽五十又九

西梅二首

瑤臺夕承月玉砌曉凝霜花映含章發枝橫禁籞長春風似相識偏惜壽陽粧

折得江南春悵望洛陽客悠悠歲年暮浩浩風塵隔遠道勿相思相思減容色

次孟天暉南山雜詠二首

賀監湖邊草色春秦淮江上柳條新山川是處堪行樂晴日風光思殺人暮春三月風日妍亂折花枝送酒船西嶺山光青浸水南池柳色綠生烟

送仁一初上人遊武林

舞鳳飛龍若箇邊天涯送遠獨凄然江山南渡降王宅風雨西陵過客船踏雪馬膠春買樹鬪茶龍井夜分泉落花寂寞東歸日烟煥冥冥叫杜鵑

雪廬新公

克新字仲銘番陽人宋左丞余襄公之九世孫始業科舉朝廷罷進士乃更爲佛學既治其學益博通外典務爲古文出遊廬山下大江覽金陵六朝遺迹掌書記于文皇潛邸之寺七年兵起留滯蘇杭主常熟州之慧日遷平江之資慶洪武庚戌奉詔往西域招諭吐蕃公爲文二十年所著有南詢藁繫南程文河東張翥所正也所與游者楊廉夫顧仲瑛丁仲容之流而今所傳雪廬藁者如送總管側失總管還朝序則徵粮于張氏由海道還朝者也蘇院判招降詩序則張氏之蘇同僉攻江陰而旋師也大率望庚申之中興美張氏之內附而於聖朝多指斥之詞其爲文自稱江左外史殆亦有微指與

送除上人之武林

雪花飛送浙江船歌斷驪駒一惘然荆棘銅駝淒暮雨樓臺鐵鳳銷秋烟遶東鶴返塵生海石上人歸月在川回首六橋楊柳外水光山色共晴天

送王尚書還朝兼簡張學士

文采丹山一鳳毛是藩徵餼衡賢豪飛帆轉海南風正曳履趨廷北極高

花擁御筵歌湛露香浮宮殿賜蒲萄朝回爲報張燕國莫把新詩奪錦袍

赴慧日寺途中寄終同知二首

舟楫南來處處過海隅東去奈愁何
梨花帶雨紅連渚黍穗迎秋翠委波
半日帆檣行柳末一天風月宿蘆科
道逢遺老詢時事惟說州侯惠愛多
渠水東邊海盡頭迷茫烟霧接高秋
狎荒田野雞豚少潮落汀沙魚鳥稠
虛市殘民茅結宇空原枯骨草連丘
重經古寺談灰劫轉使孤懷增百憂

登姑蘇城

城上旌旗煙霧重樹頭初日出雲紅
一溪鷗散桃花雨兩岸鶯啼楊柳風
邊塞鼓鞞終日振鄉關道路幾時通
江南春色渾依舊來拓青青門巷空

張真人字初

宇初字子璿嗣漢四十二代天師正常之冢子也五歲讀書十行竝下嘗
侍父登樓見雲霧起西北金扉洞開天神護衛鎧仗森列父戒之曰天機
勿泄也洪武十年方髫髻襲掌道教入見奉天殿上熟視笑曰瞳樞電
轉絕類乃父蓋歷代相傳以眼圓而鉅者爲玄應也永樂八年示疾書誦
而逝宋文憲公稱宇初穎悟有文學大稱爲列仙之儒王紳仲緒序其集

曰公於琅函藥笈金科玉訣之文博覽該貫六經子史百氏之書大肆其窮索篇章翰墨各極精妙蓋江右文宗多吳文正公虞文靖公之遺緒而公能克軼之也今所傳峴泉文集二十卷詩居其半五言古詩意匠深秀有三謝韋柳之遺響其文如玄問諸篇極論陰符上經之理而叅合於儒家其所造詣可謂卓然矣唐宋以來釋道二家並重有元末高道如吳全節薛羲之流皆顯於朝廷國初名僧輩出而道家之有文者獨宇初一人厥後益寥寥矣二氏盛衰之畧如此識之以俟傳方技者

獨酌

曙雨收餘春新流注深谷幽居絕世氛微月澹叢竹翹葉非素耽聊從寫情曲吹萬等勞生胡能競奔觸

養疾

四首

懷疴卧宵雨曉雷震南隅養疾向微愈食息稍自如開顏盼林木草莽未剪除整書避礎潤新水盈川渠天雲復西行陰翳交庭蕪感幻慕輕逸澄神以凝虛杜權發幾踵慎損良非愚歛視滌塵滓輒軻安足拘冬風何凝寒嚮晦復淹疾葉落群林鳴百草悴叢茲寒谷回微陽流雲澹

孤逸事藥偶就火親書猶抱膝窗帷煖氣舒然燈月初出竭礪無晨冰繁
霜熟園橘天壤曷有瘳氣機疇與逸淵默養太冲何必懷方術

沐髮不整冠寒飈吹薄帷願疾聲帶緩編簡生塵姿妍芳悴藪澤蓬蔓餘
春菲露下空階明栖鳥巢故枝浮生等大患藥石豈吾資但愧壺丘子榮
悴何足悲

濯足山澗中杖策暝乃還寒螬鳴疎樹落日下西山灌園露已溼倦息衡
門間墟里或過問跬步愧益艱靈空非苦疾鶉衣畏和寒寧貽啟期誚齒
落無衰顏

夕懷

落日未沒山明霞爛西隅疎林俯平野飛烟散輕鳧宿鳥栖復鳴燈火起
隣墟明月照東園餘寒襲裳襦啟扃坐虛庭延泳思莫舒世故感浮情淳
風朝夕殊玄天默無語終爾歸空無

山舍夜坐紀興

潛僻非世圖幽恬足真賞晨招逸人來遠策緩藜杖叙別罄春醪園蔬雨
餘長延懼喜就宿窗籟風泉響露喧候蟲林星耀虛敞芳池寫初月山

氣襲膏壤沉寂諧靜便栖遲愜敦養輕蜩蛻汚濁冥鯤絕病癢久違商皓
遊焉期漆園想然薪盡永夕聊與謝塵鞅

乙亥季夏還山居偶興

末夏熾餘暑幽期諧素衿川源蔽繁綠溪渚澄蒼潏田舍靜雞犬荒溪抱
深林圓淵敞靈構疊嶂羅高岑荷氣薄朝露魚波衣重陰披荆遂恬息濯
澗清開心遣世匪塵傲養真宜自任秋風動早思寓我丘中琴

負暄二首

負暄愛日和雲靄薄向舒窮山積寒翳庭樹凋亦踈下泉方斯罄田野聊
安居禾黍藉隴畝返刈多空虛感念曷爲整世滴跡亦殊焉知溫涼樂尚
及散與樗繁霜悴百草幽花雜園途獻君亮何由蕪穢益自除寥寥太古
意涵泳自有餘

投身寂寞濱自謂此生足環堵翳蓬蒿清陰覆園綠聊支風雨凌寧與世
緣觸息交輪鞅稀寡慮鮮情束蔬食不求餘高趺惟弊服結習塵障生虛
妄薰陶熟苦澹視莫親浮縈互趨逐孰探天地和心境湛敦復大哉良始
終碩果契山木

野眺

北風吹狂瀾江水濁不澄牛犬行平岡木落山縱橫輕霧散林渚孤鍾度
危城泊舟且無寐長河終夜鳴弊服勸馳邁積雨將寒生物情異旦暮幻
質奚將迎悽悽葭菼間悵悵徒撫膺

甲戌三月二日出行

霽雨解前峯幽原策婦路荒踐蔓草春野水平橋度悅鳥近聲圃耕牛緩
犁步豐泉陰窸鳴密竹中園素靈岫敞虛軒荆扉護雲固新流汎池落繁
翠盈窗戶掃榻理殘書扶筇歷榛嶺丘林適所娛姤澗豈浮慕空澗美遐
蹤顛危場宜務安由絕世緣木石藉深處倦翮止枝巢先迷感餘悟聊舒
拙遁情生意足農圃

雪晴遣懷

辭鄉苦淫雨旬日喜初霽達曙星漢明嚴霜凜寒氣僕夫戒晨發解纜火
先熾狂風初向止朝旭悅南至宿雪散平川遙烟澹孤嶼峯迴積雪白巖陰
流細野艇遡漁綸商帆冷鳬戲洲渚薄飲傾人烟闐迢遞征途值歲晏行
邁眷遐睇塵網日踈違危機慨浮世束書謝旅貞百感胡內駭君恩戴

厚寒拙愧庸器寵渥踰素期微裨莫涓致民瘼困蠹賊管晏渴群睨顧念
衰朽侵何由觀經濟汀梅爛始英崖竹滴空翠少慰幽晦情奚能愜真契
願言返駕早永託丘園想

登陸文安公象山祠堂故址

藐堯體乾運王道持倫綱舜禹製神器精一斯傳彰周亡雅頌息何尼語
張皇伊說佐受命况軻司振揚偉茲大經奧百世垂輝光陵夷幾更歷明
晦違天常濂洛啟潛閤建中續虞唐青田荆山璞宏聞皎旻蒼寸心宰靈
妙昏塞非違傷動靜該至理惕焉惟內強聖訓炳星日卓操踰冰霜橫經
宅雄勝古象增渾麗雪館夜燈集風庭春雨長闔閭覺支蔓吳楚被餘芳
驚質提庸昧師謨幸遵詳雲岑慕遠謁佛刹榛蕪藏探陟訪遺舊荒基屹
崇岡肅衿悚瞻睇天宇澄秋陽翠臺聳前挹曠渺坤壘芒浮觀勵先躅敢
意窺鴻荒端駛難砥柱大音孰儀鳳八表視環轍千齡仰休光

癸亥元日

初陽改歲運積雨晨將曉微和兆春育雲物薄向舒清瀨散幽汀佳禽語
荆蕪飄梅藉苔逕叢竹橫交疏池萍斂相綠密藻含清漪玩理足自悅物

同豈無餘年更愧齒長鈍學終焉如嚮晦惟慎獨紳言良足書

晚霽

夕陽媚春暉浮翳方四展喬木欣向榮陰雪明孤嶽疎簷鳴晚風寒霜曉
初遍悅鳥喧漸和新流汎池淺遙烟澹墟隣雲磴盤幽磔落日穠農談園
蔬綠方剪年增感易深悔吝疇自遣素業慨高懷研心資礪礪玩世適餘
生誰將眎真踐

仲春喜晴

近社喜連晴林風和仲月清霜滯秀姿偃卧澹怡悅林暝鐘盡遲池平草
初茁溪嵐散喧瀨浦樹森榮發淹抱非世徒遐蹤踴高潔陽岡栖白雲偃
息孤懷懷幻跡信萍蹤虛矜皎冰雪

旅懷三首

落木號凄風蟋蟀鳴四壁寒燈照簾帷鼓薄林露滴弊帙散未收遺言藉
閒適更長城鼓遙星月襟行跡餘夢感遐思初霜古楓赤忽茲歲月深轉
軻念登歷虛中竟誰論永夕增歎息無寐幽抱盈空林靜寒碧

起早月尚明微風輕庭樹遙鐘盡殘河池草盈白露披衣行空庭孤禽語

平昭酬措每踈慵晨光起簷戶孰知愁處牽丘壑慕恬素薄俗損奸佞皇
情感深顧歲闌貧病侵幽憤徒朝暮

夕陽下城西平野荒烟斷浙瀝晚風鳴鳥靜蕭瑟亂婦人行且遲落木疎
汀岸滯放倏秋霜池月來輕慢方慚嬰世氛悔吝益貞幹羈繫久何堪良
猷匪前算聊從適素懷斯道俟潛貫獨有歲寒心松筠契冰漢

元夕後喜晴登靖通菴

春陽謁微和扶疾釋餘怠真館肅虛寥幽尋倏逾載小逕迷積葉雲蘿迺
空籟飄梅散輕颺竹栢紛暎帶澹寂每清神晴岑列窓黛燈宵裸市喧鵲
佇凌空界撫心倍仰止素託抱深賴叢陰支倦還由茲悟懸解

觀朝雨

春陽萬初暄宿雨散晴霽虛室湛冲融研書感崇慕新流漾海風密解留
閒步園鳥鳴曙柯炊烟澹墟樹夙心際玄邁近景暢川赴俯暇抱深衷馳
形愧前務良歎寡志符中亮徒潛顧飾僞等塵睽願貞止安素帶經農圃
間恬逸自隨處化育有至功希言睇先睹

春雨述懷

方雨盈暮春微和殷仲月幽居適靜恬靜此煩憂結管葛非世才軼斯固
時憂悲懷黎元慨易觀孤憤輟願協安期遊遠遂巢由別防閑在立誠肥
遯滯所悅永久恨齊霖崇朝坐輕颺韶光愈萍梗榮艷第消歇弱柳間啼
鶯叢芳薄鳴鳩迴溪急漲喧夢草群芳薜蔓寂樂虛明塵編或餘閱蠅封
就朝暮孤吟紛起滅千載一息存冲矜皓冰雪精廬分處約念彼情內熱
終耕岩谷栖指軀付高涼

六月二十三日晚宴仙岩有賦

宿雨解秋陰幽尋泛清渚先晨預幽期真賞宜闌暑華萼秀聯芳耆英善
談塵輕流淡抱沙遠瀨潛通浦峭石散支機澄潭迴鉅舄蘋鷗點雪華汀
鷺浮銀度野蔓晦重陰遙山帶微雨探奇盡窮僻始訪雲岩路靈竇虎龍
盤神蹤開軒戶苔深悶庖庖蘿翠橫機杆浩嘯絕氛埃空磔激烟霧壘懸
一室虛列席平沙許勝集豈凡緣諧歡禱觴俎自非契仙仙調歲閱方瀛府
誠謁復古祠牽塵愧遲步丹丘擅雄怪宜此風雷護曠劫眎浮槎冲襟滌
千古

晚興偶成

明沼湛方諸新流漲嘉樹玄陰度嗽雲絕磻飄寒霧人蹤泥潦稀明色禽
蛙驟遠啼感先期叢懷慨危務休沿遂茲適世慮情纏互妄跡逐塵生眞
源妙無所春華又易年衰寒增慚暮得失從化機丘園足跼步

步南澗作

謝拙契衡茅還節熟登眺丘林滿秋氣澗谷集繁藂陰翳微雲層岑屹
孤峭平原過雨滋落木輕風漂嗟予困蹇運退遁匪觀微臥病口衰遲資
藥慚非少山知悔吝長得失從喧訥擇執視汚隆哺竭望笑踈淪恥奔
流兀隄慨殊調絲塋或勝用薄缶難終噉息窮事抱壅適趣逢荷篠寧效
窮途悲欣洽蘇門嘯降衷屬明命玄默閱機妙哀哉徇俠徒日久白淪燎
萬化會有崱投簪藉漁釣枿鑿異所投艱貞躬滿耀諧諠遽成虎矜宿仰
明照

雪後早還

幽人素嘉遯勵節抱貞獨冬候喜久和言旋課樵牧器應頓斯滌冲漠久
帶足雲嶽弱層雲風崖峭孤木初梅含衆芳澗沼沁寒綠開軒理遺帙然
新詩獨自悲世網嬰息倦射羈束強涉川途艱荒逕凋松菊辭蒙休明

春生春鑿披腹就志後簪裾惟懷友虞鹿矧茲氛侵馳轡轉迭摧踞志士
恥軒途汗隆登藩顧詰其寂徒洗耳臨澗曲非乏解牛矧慚媚忘羊逐
席溫勾漏松棹佇山陰竹永託歲寒則冰霜靡萎散玄陰未改春流景虛
何速悟幻信若浮虛中了無欲鄙哉鱗鱗趨鯉腐甘驅促千載付空言浩
歌還凌谷

臥疾

養疾逢春盡庭除半草萊亂雲添夜雨驚鳥落殘梅濁俗增香火閑心久
木灰白頭非所待林臥絕塵埃

喜晴

立夏天方霽閑情喜暫舒樹深添雨潤溪落見人疎夕照斜依竹圓花落
近書年來惟懶拙殊覺稱幽居

山居晚起

曉霧成秋冷山居竟閒然宿雲黃葉路殘雨白榆天澗落魚絲靜苔荒屐
齒連無由謝塵垢高枕並書眠

晚遊新興寺

曉過新興寺扶藜野步輕鳥啼春雨足花落午風晴僧室連雲住山阿帶
纔行武陵歸路近已聽澗松聲

望吳山

吳越遊程熟溪平驛路分夕陽回浦樹秋色滿湖雲山潑船孤棹淒風雁
獨聞浣花茅屋小別思夢紛紛

晚行二首

倦行偏旅思疏味喜初聞野道堆黃葉人家住白雲鳥啼斜照薄風急暮
帆分歸策猶暄暖徒知厭世氛
苦疾嗟長道舟塗總未安晚程逢雁少秋夢到鄉難魚賤知河落鷗輕信
水宵驚師時凍語不敢怪風湍

輝山登舟

經行山迤熟霜葉滿歸舟野渚橫疎樹重灘引細流殘霞驚水鳥寒月白
蘆洲鄉邑欣逢舊從耽水木幽

鵬月望夜

臘半宜陰凍青陽轉小和江梅春煖動霜月夜寒過霽生隨鷗盡朝雲逐

履參襄遲推礪經寧意紫芝歌

野眺

山谷寒應早幽懷絕垢氛白波雙澗雨紅樹半坵雲啼鳥欺新冷潛魚傍夕曛寂寥何所慰先哲有遺文

春暮自遣

林居休暇日春盡夕陽坡山近青嵐少池平綠草多暄風集燕定殘雨曉鶯和薄世情緣滯應漸逐逝波

桐江卽事

每愛桐江秀塵衿洗黛螺水流渾不盡山靜看偏多秋樹連雲住漁蓬載雨過何當無一繫釣瀨老烟波

春寒

好逕寧高尚栖遲若去官掃雲期晚霽臥雨惜春寒張說文辭癖陶潛水木寬故人書少慰塵累了無干

月下夜行

官舸宵征上丹衷切帝畿水寒霜逼枕江靜月侵衣微火村墟僻殘烟輞

畧希山林衰倦久鷗鷺悵忘機

秋夜

暮秋風露菊初黃夜冷侵幃鮮薄裳
雨氣著簾林暝早樹聲接市澗喧長
囊書隨分窮糟粕塵事關心付糝糠
安得委身蟬蛻等白雲黃鵠與翔翔
訪朋山如愚尊師榆原真館

榆晚高堂續構成獨橋雙澗步秋清
牽籬野蔓殘花影遶戶林塘過雨聲
種木圃通黃葉路採芝人老白雲扃
誅茅擬傍朋山主且遂茅茨話拾荆
偶成

寥落文衿歎二髦倚空灝氣渺秋毫
樹雲分暝侵殘帙江雨添涼入滌袍
新沐尚應慚貢禹故書猶擬寄山濤
無端歲月催疎髮笑指蘆花試小初
客中病懷

彌旬臥疾越江干無限鄉愁遣更難
梅雨漲溪啼鳥滑蒲烟溼岸落花殘
玉階累擷芙蓉珮瓦缶猶斟苜蓿盤
身世浮雲知底似客懷直欲向誰寬
聞霜鐘

霜滿瓊林度曉鐘月華流韻徹晴空
投簪幾憶鴻鳴露欹枕猶驚鶴唳風

銀葉香消深館裏梅花調遠古城東十年感慨成無寐應律音長豈世同
晚立

曉試春衫雨霧中半庭芳草溼殘紅杜鵑啼過斜陽去又是樓頭芍藥風
感舊偶成

故朝臺館勢連空多在荒烟野水中愁殺蘆洲風急處寒笳吹過暮城東
忽雨二首

飄風急雨燕初泥新竹成陰小閣西數卷殘書香篆息園花落盡到茶藤
依稀煙樹暮鴉風春事無端怪落紅白髮相知有誰在捲簾閒坐雨聲中

三月一日寒食

殘花細雨半鈎簾過雨溪山總翠藍禁火人家春寂寞鶯啼應未到村南

晚興

晚來山色翠芙蓉樹帶溪聲水接空自是江南春雨久柳陰啼鳥棟花風

題自画秋林平遠

北苑高情宿世同疎林汀渚正秋風研池洒墨應多思寫向寒烟夕照中

故園自適

是雨啼鶯著意聞晚香欄檻小桃春時光怪殺空歸去似倚垂楊綰住人
社日雨

桑柘林中正雨肥誰家醉社板橋西風烟只著垂楊柳莫遣梨花溼燕泥
春寒

煙雨聲中酒夢殘
蕙添綠又春闌
鴉鳴處西風急
自是楊花惹暮寒
問鶯

綠陰垂地曉聞鶯
山雨溪嵐郭外情
正惱病懷無緒久
遠風吹作送春聲
四月三日赴演法觀視斷碑因賦

雨逐西風遍野蹊
翠林深密石橋迷
杜鵑不識春歸盡
尚送餘寒著處啼
病懷二首

曉寒花影罷芳叢
半下疎簾拂面風
病態不關淹酒思
殘香看過雨聲中
幾株芳樹曉婆娑
六尺橫窗臥小疴
夢到西湖聽春雨
湧金門外落花多

南豐舟中

春寒啼鳥怯西風
小艇江波溼霧中
並坐短篷消盡片帆烟
雨到城東
過姑蘇

寒林人語四更初野水湖烟半有無城郭蕭條應夢少月斜曉鼓到姑蘇
夏景

深院棋聲月正長博山添火試沉香道人懶起龍行雨帶得東潭水氣涼
冬景

養就還丹不怕寒獨騎黃鶴上雲端笑談借得天家雪散作琪花滿石壇
子陽子席應珍

應珍字心齋號子陽子海虞人年未冠入道提舉虞山之致道觀真經秘
籙靡不洞曉兼讀儒書于易尤邃嘗居相城靈應觀與沙門道行爲忘形
交道行師事之行公卽姚少師廣孝或云少師兵法牛是心齋所傳也洪
武十四年三月卒年八十一

周玄初來鶴詩二首

瑤壇法箓土蕭臺羣岩晃縹緲白玉京空歌協雲韶靈駕御八景多士嚴
趨朝琅風颺清微天花雨曾霄皎皎群胎仙嘯歌雜靈璫前參紫霞蓋後
遶青霓旌覽茲孝子誠赴此仙人招阿母鍊魂仙尚超謝塵賢控烈不待
轡飛飛凌沈寥置身王母宮坐看劫石消

東風朝元禮玉壇散花天女集雲端仙人騏驎紛前導上帝旌幢降下界
珠懸光燁燁桂花香冷露溥溥空歌奏徹琅風細一一飛鳴獻頂丹

贈周玄初

春晴步屨黃泥阪楊柳陰陰水拍城童子候人如鶴瘦羽仙飛舄似鳬輕
碧桃花繞樵雲屋綠酒香浮貯月罌醉裏却嫌天地窄倚闌吹笛到天明
題章復面碧桃

憶昔瑤池侍宴時碧桃花下酒盈卮今朝醉裏看圖畫羞對東風兩鬢絲
余善

善字復初玉峯清真觀道士楊廉夫跋云此予方外生余善追和張外史
遊仙詩一十解予小能加點讀至長桑樹爛金雞死客遶床三叫以爲老
錢喉中語也又如一壺天地小如瓜雖老錢無以著筆矣至正癸卯春王
正月上日錢龍老人在玉山高處試奎章賜墨書

追和張外史遊仙詩五首

讀書趣燕五城東下視星辰在半空行過瑤臺重回首玉清更在有無中
城闕芙蓉曉未分身騎金虎謁元君青童不道天家近笑指空中五色雲

溪頭流水飯胡麻
曾折瓊林第一花
欲識道人藏密處
一壺天地小於瓜
不到麟洲五百年
歸來風日尚依然
禪龍化作雪衣女
來問東華古玉篇
春宴瑤池日景高
烏紗巾上插仙桃
長桑樹爛金雞死
一笑黃塵變海濤

題顧玉山澹香亭

玉女乘鸞下絳霄
梨雲漠漠帶香飄
簾開澹月香初發
雪滿柔條暖未銷
花下洗粧時載酒
亭前度曲夜吹簫
主人愛客情懷好
折簡頻煩遠見招

盧大雅

羽士盧大雅龍虎山人

題錢塘勝覽圖

南渡衣冠委草萊
危亭高處海門開
雲霞都已雄中國
月露軒窗逼上台
春夢已隨流水去
寒潮自領夕陽來
小樓題画因惆悵
豈獨昆明有劫灰

舟中寄張外史

棹郎催踏春溪舫
阻我辭君散木亭
江水未應春去漲
鄉山偏向別時青
烟波釣艇新衝雨
河漢仙槎舊犯星
輪與仙都吉居士
一簾山雨聽鶉經

春曉

弱柳搖烟落絮輕綠陰初長小池平杜鵑處處催春急不是東風太薄情
追哭張伯雨外史

身似浮雲半在吳玉鈎橋外是西湖花前微雨白鵝帖樓上好風金鴨爐
李泌只宜留北闕劉郎不得老玄都人情翻似東流水洗出青天一鳥孤
周思得

思得字養真錢塘人行靈官法先知禍福文皇帝北征召扈從數試之
不爽招弭祓除祈雨贈兵咸如影響乃命祀靈官神于宮城西靈官藤像
上獲之于東海朝夕崇禮所征必載及金河川昇不可動就思得秘問之
曰上帝有界止此也已而果有榆川之役思得歷事五朝年踰九十賜謚
弘道真人

夢遊仙詞二首

雲樹蒼茫月正明座中還遇董雙成玉簫吹罷桃花落猶記霓裳譜上聲
玉扉雙啟爛金鋪樓閣玲瓏湛玉壺一曲霓裳看未了又隨白鶴下玄都
初晴

天街十二正春陽小草離離雨後香吹徹瑤笙人更寂桃花洞裏日初長

鄧青陽羽

羽南海人國初青陽縣令後爲道士常居武林後隱武當山之南巖永樂中不知所往人以爲仙去有觀物吟一卷自言忘情消白日高臥看青山動落花流水之機適聞雲幽鳥之趣遂成意外不期然而然之句

暢情

花無長在樹人無長在世有花須當賞有酒須當醉秋霜上髮來春風吹不去

絕句

人生天地長如客何獨鄉關定是家爭似區區隨所寓年年處處看梅花

列朝詩集

閩集卷第一